

四庫全書

史部

欽定四庫全書

江西通志卷九十一

人物 二十六

南康府

南北朝

周續之字道祖雁門人其先過江居建昌八歲喪母哀戚過於成人奉兄如事父晉太守范甯立學集徒續之年十二詣甯受業數年通五經五緯號曰十經名

冠同門稱為顏子既而閒居讀易老入廬山事沙門
慧遠時彭城劉遺民遁跡廬山陶淵明亦不應徵命
謂之潯陽三隱嘗以嵇康高士傳得出處之美因為
之注武帝遣使迎之禮賜甚厚每曰真高士也通毛
詩六義及禮論注公羊傳

南史

李遷哲字彥安南康人後梁明帝時黔陽蠻田等抄掠
江中為患遷哲出討殺獲甚多尋詔遷哲鎮襄陽陳
將章昭達攻逼江陵告急於襄州衛云直令遷哲往

救湖廣通志

司馬曷建昌人仕陳為大中大夫性至孝母病亟禱於

先祠願以身代母果得痊

明一統志

司馬延義字希忠建昌人為陳司徒從事中郎事親孝

居喪哀毀朔望詣墓哭奠路旁老栢遂為枯瘁

林志

凌恭字遵德建昌人精通五經埋名晦跡煬帝時召為

學士同上

唐

張懷約字進宏建昌人初仕隋歸唐為溫州司馬博學

強記文詞典麗講三禮三傳出諸儒之右性尚簡約

後隱於當陽山莫知所終

明一統志

郭元靖字長寧建昌人才兼文武隋末興兵保衛鄉里

歸唐累官虔撫吉三州司馬衡州刺史所在以廉謹

稱豫章書

徐元之建昌人幼穎悟通經史年十七第進士為監察

御史累遷邠王府長史改曹州刺史有文集十卷

林志

熊孝子名仁瞻洪州海昏縣人性至孝為袁州宜春縣
丞喪母奉柩歸卜葬縣西歸義鄉岡阜嶮峻喪輿莫
能致孝子念非水道不可達誓傾家資掘地為川以
通江方庀工俄而天大雨水自墓旁近地湧出成川
與江流接舟以得達既葬結廬墓側居六年有慈烏
來巢之異觀察使路嗣恭以聞勅旌其門孝子官至
蕭山縣令卒世名其川曰孝子港橋曰孝感橋里曰

孝錫坊

王忠
文傳

按海昏縣漢屬豫章郡即今南康府建昌縣地唐隸洪州宋太平興國七年置南康軍割洪州之建昌隸焉故孝子應入南康然考後漢書海昏自永元十六年分立建昌縣宋元嘉中廢海昏移建昌居焉宋書郡國志唐書地理志洪州所屬縣俱無海昏今傳以孝子為唐洪州海昏縣人不審所據前志未載今采忠文集補

朱如璧建昌人早孤家貧賣薪易食以養母寒則溫席

暑則揮蚊二十餘年無倦採訪使韋虛舟雅重之

安志

宋

洪文撫南康建昌人本姓殷犯宣祖偏諱改焉曾祖諤
唐虔州司倉參軍子孫衆多六世義居室無異爨就
所居雷湖北創書舍招來學者至道中本軍以聞遣
內侍裴愈齎御書百軸賜其家文撫遣弟文舉詣闕
貢土物為謝太宗飛白一軸曰義居人以賜之命文
舉為江州助教又詔表其門閭自是每歲遣子弟入

貢必厚賜荅之文撫兄子待用登咸平進士至都官

員外郎

宋史

按前志有劉彥誠傳以為都昌人仲武之父錡之祖既又加駁正據宋史劉仲武劉錡傳本秦州人今查陝西通志有劉仲武則與都昌無涉也故刪之

孫琛冕子冕請白鹿洞故址為歸老地詔從之未歸而卒琛即其址家焉皇祐中以家資置學館十間扁曰

白鹿書堂以教子弟就學者廩之郭祥正為記仕至

禮部郎中

林志

陶唐字元堅星子人潛之裔通六經精子史尤長於春

秋發明與旨後學名士多出其門

同上

李亮采建昌人臨川鄒餘吳履中相繼為鄂州通城知

縣於學宮建資源堂以書幣聘亮采典教事力學以

待舉修己以致人士皆樂就之

黃山谷資源堂記

李常字公擇南康軍建昌人也舉進士調江州判官宣

州觀察推官發運使楊佐薦改秩常推其友劉琦佐
曰不見此風久矣并薦之議者謂常能舉善而謂佐
為知人除祕閣校理熙寧初自太常博士改右正言
時方更法常言始建三司條例司已致天下之議至
於均輸青苗歛散取息傳會經義人且太駭又言州
縣有不散常平錢而使民出息者詔常具姓名以
聞常不以聞遂落校理通判滑州歲餘復職知鄂湖
齊三州召為太常少卿遷禮部侍郎哲宗立進吏部

侍郎常上七事曰崇廉恥存鄉舉別守宰廢貪贓謹
疑獄擇儒師修役法又論役法差免二科以為法無
新陳便民為是今使民俱出資則貧者難辦俱出力
則富者難堪盍各從其願庶幾可久加龍圖閣直學
士論取士請分詩賦經義為兩科以盡所長改兵部
尚書辭不拜出知鄧州徙成都府而卒年六十四有
文集奏議六十卷詩傳十卷元祐會計錄三十卷常
少讀書於廬山五老峰白石菴之僧舍書幾萬卷既

貴思欲遺後之學者乃藏於山中時人目其居曰李

氏藏書山房而蘇軾為記其事云

東都事略

崔閔字誠老星子人讀書不務進取襟懷清曠以琴自
娛結廬於玉澗號睡足菴自謂玉澗道人東坡過之
曰醉翁喜瑯琊山水沈遵以琴寫其聲惜乎無辭今
玉澗道人妙於琴故因其聲而為辭以補石刻在郡

齋

林志

陳圓字德方星子人飽學獨行嘗應制科尋隱後山名

輩多出其門黃魯直訪之賦詩有域中咫尺雲橫棧

獨倚前山望後山之句又名其堂曰獨善

林志

陳慕

一作篆

字必正星子人宣和進士少從陳瑩中劉壯

輿蘇養直遊廉靜有守歷任州縣所至有政聲及佐

大藩或勸求郡不肯屈節歷倅洪潭明三郡以祖業

遜兄初預寄居後山號星灣先生子準字正臣以父

蔭補官年五十即挂冠歸

林志

李公懋字子勉建昌人建炎進士累官江西提舉召對

陳五事擢監察御史高宗駐蹕建康大臣請還臨安
公懋力排秦檜以為不可疏三上不報出為湖北提

刑累遷太府少卿終湖南漕

林志

曹興宗字伯起都昌人紹興進士仕至參軍贈光祿大
夫所至政聲籍甚子三人長彥純次彥約俱受業朱

子之門彥約自有傳

人物志

雷潔字朝宗建昌人胡銓一見大嘉賞張栻尤推重之

上同

蕭之敏字敏中都昌人登進士授監察御史累官吏部侍郎出為湖南轉運副使終祕閣修撰周必大銘其

墓

林志

戴師愈號玉谿子星子人博學強記撫廬山古今人物著列傳十三卷又作麻衣易後登隆興進士授湘陰

簿

同上

曹彥約字簡甫都昌人淳熙進士嘗從朱子講學薛叔似宣撫京湖辟主管機宜文字漢陽闕守檄攝軍事

時金人大入郡兵素寡弱彥約搜訪土豪得許禹俾
總民兵趙觀俾防水道党仲昇將宣撫司軍屯郡城
金重兵圍安陸遊騎闖漢川彥約授觀方略結漁戶
拒守南河觀逆擊斬其先鋒且遣死士焚其戰艦金
人大敗去又遣仲昇劫金人砦殺千餘人以守禦功
進秩二等就知漢陽尋提舉湖北常平遷湖南轉運
判官時盜羅世傳李元礪等相繼竊發桂陽茶陵安
仁三縣皆破彥約至彼督運人心始定遷知潭州湖

南安撫世傳素與元礪有隙至是密請圖元礪以自
効彥約錄賞格報世傳遂禽元礪彥約還長沙未幾
復出督戰餘黨悉平擢右侍郎官出為利路轉運判
官兼知利州關外乏食彥約悉發本司所儲減價遣
糶勸分免役通商蠲稅民賴以濟差知寧國府又改
知隆興府江西安撫遷大理少卿以寶謨閣待制知
成都理宗即位擢兵部侍郎入對勸帝講學防近習
次言當以慶厯元祐聽言為法以紹聖崇觀諱言為

戒比年以來有以賣直好名之說見於奏章者願陛
下倚忠直如著龜去邪佞若蝨賊其有沮撓讜言者
必加斥逐會下詔求言彥約薦隆州布衣李心傳素
精史學乞官以初品寘之史館遷禮部侍郎授兵部

尚書力辭不拜以華文閣學士致仕卒賜諡文簡

宋史

黃灝字商伯南康都昌人入太學擢進士第教授隆興
知德化縣以興學校為本歲饑行賑有方光宗即位
遷太常簿請勅有司取政和冠昏喪葬儀及司馬光

高閎等書參訂行之除太府寺丞提舉常州路常平
秀州海鹽民伐桑柘毀廬屋茅瑾盈野而州縣方督
促逋欠灝見之覺然時有旨倚閣夏稅遂奏乞併閣
秋苗不俟報行之言者罪其專移居筠州已而削兩
秩灝既歸里幅巾深衣騎驢匡山間若素隱者起知
信州移廣東提點刑獄告老不赴卒朱子守南康灝
執弟子禮質疑問難朱子沒學禁方厲灝單車往赴
徘徊不忍去者久之

同上

按黃灝所著有西坡集四十卷卒謚文簡史傳失載

李燔字敬子建昌人紹熙進士授岳州教授未上往建陽從朱子學至岳州教士以古文六藝不因時好以祖母卒解官承重補襄陽教授復往見朱子凡諸生未達者先令訪燔俟有所發乃從而折衷謂人曰他日任斯道者必燔也朱子沒學禁嚴燔率同門往會葬不少休及詔訪遺逸九江守以燔薦辭郡守請為

白鹿書院堂長學者雲集尋添差江西幹辦公事會
洞寇作亂燔請自往分兵守險馳辯士諭賊順逆禍
福寇皆帖服洪州地下異時贛江漲而隄壞久雨輒
澇燔白於漕帥修之自是田皆沃壤有旨改通判潭
州真德秀為長沙帥一府事咸咨燔不數月辭歸時
史彌遠當國自是不復出卒年七十贈直文華閣謚
文定燔入仕凡四十二年而歷官不過七考居家講
道學者宗之與黃幹並稱曰黃李

同上

馮椅字竒之都昌人受業朱子紹熙進士仕至江西運
幹家居授徒所著易詩書語孟太極圖西銘輯說孝
經章句喪禮小學孔門弟子傳讀史記及詩文志錄
合二百餘卷配饗於學子四人去非仕至諫議大夫
去辨仕至侍郎去弱知寧國府去疾直徽猷閣

人物志

彭尋字師繹都昌人淮寧府學教授南圖之孫有文行

鄉里稱曰東園先生嘉定間特奏名

林志

彭蠡字師范尋之弟文公守南康時門人質疑義辯析

甚精為文公所重號梅坡先生築室訓徒授業江淮
之上官至吏部尚書贈龍圖閣學士

人物志

彭方字季正都昌人朱子守南康方就學於其門弱冠
魁省闈累官至祭酒兼侍講執法至殿中遷兵部侍

郎請歸加龍圖閣學士謚文定

同上

馮去非字可遷椅子淳祐進士為宗學諭丁大全為左
諫議大夫三學諸生叩閣言不可下詔禁戒詔立石
三學去非不肯書名碑下未幾以言罷歸舟泊金蕉

山有僧上謁致大全意願無遽歸少俟收名乃奮然

正色曰老夫今歸廬山不復仕矣絕之不與言

明一統志

鄧輪字伯衡建昌人理宗朝甫七歲舉神童科十七登

第授黃梅主簿陞江西運幹所在有政聲弟興字伯

載亦八歲由神童科理宗朝登第授和州司戶

人物志

熊兆字世卿安義人受業於朱子學得其傳隱居弗耀

自號拙逸子文公為著拙逸子說以遺之

白志

按朱子全集無拙逸子說其裔孫孝廉名秉鐸錄

以見示附載於後云熊君世卿乞書拙逸二字余
曰作德心逸日休作偽心勞日拙毋乃與子之言
異乎君笑曰彼巧者勞智者憂吾惟拙故逸云爾
拙非繆悠之謂也物之自然性之天也蔽吾天汨
吾自然窮年竟歲方寸擾擾隨富且貴求吾一日
之逸有終身不可得者矣余曰意逃世網而解天
刑非君其誰哉

原跋

际拒字咸和慕之子任江夏令築堤捍水民德之調善

化佐淮東總幕築楚州城終池州倅

同上

陳秬字秀成秬之弟力學忘倦交遊必擇三試禮部不

第遂棄科舉師事文公義理益精

同上

胡泳字伯量建昌人嘗從朱子游不樂仕進學者翕然

尊之稱為洞源先生從祀白鹿洞三賢祠

同上

周謨字舜弼余宗傑字伯秀李輝字晦叔劉賁字炳文
俱建昌人四人同學於朱子之門並有時名不求仕

進

同上

呂炎字德明建昌人與弟呂燾呂煥同遊朱子之門學

成而歸隱居弗仕道德聞望為時所重

人物志

周耜字植叟星子人性沈靜博雅好古有詩名常侍父官襄陽帥臣張杓一見竒之待以殊禮晚集文公語錄以詔後學江東繡使禮聘為白鹿洞主其講學至

老不倦云

人物志

江萬里字子遠都昌人少神雋有鋒穎連舉於鄉入太學有文聲理宗在潛邸嘗書其姓名几研間以舍選

出身歷池州教授沿江制置司兩浙安撫司幹辦公
事召試館職遷著作佐郎兼樞密院檢詳文字知吉
州創白鷺洲書院召為屯田郎官未行遷直祕閣江
西轉運判官權知隆興府創宗濂書院久之以駕部
郎官召遷尚右兼侍講史嵩之罷相拜監察御史遷
殿中侍御史萬里器望清峻論議風采傾動一時帝
眷注尤厚嘗乞祠省母疾不許屬弟萬頃奉母歸南
康旋以母病聞萬里不俟報馳歸至祁門得訃而議

者謂萬里母死祕不奔喪反挾妾媵自隨於是側目
萬里者相與騰謗萬里無以自解坐是閒廢者十有
二年後陸德輿嘗辨其非辜於帝前賈似道為京湖
宣撫大使以萬里帶行寶章閣待制為叅謀官元兵
圍鄂似道以右丞兼樞密使移軍漢陽萬里遷刑部
侍郎似道入相萬里兼國子祭酒侍讀入對遷權吏
部尚書同簽書樞密院事隨以言者去官後以原職
權福建轉運使度宗即位召遷叅知政事萬里始雖

為似道用然性峭直臨事不能無言故每入不能久
在位帝在講筵每問經史疑義及古人姓名似道不
能對萬里常從旁代對似道怒謀逐之萬里四乞祠
不候報出關後二年知太平州兼江東轉運使召拜
叅知政事進封南康郡公既至拜左丞相乞祠加觀
文殿大學士提舉洞霄宮尋予祠時年七十有六矣
明年元兵渡江萬里隱草野間為遊騎所執大詬欲
自戕既而脫歸先是萬里聞襄樊失守鑿池芝山後

圃扁其亭曰止水人莫諭其意及聞警執門人陳偉
器手曰大勢不可支余雖不在位當與國為存亡及
饒州城破竟赴止水死左右及子鎬相繼投沼中積
尸如疊事聞贈太傅益國公加贈太師謚文忠

宋史

江萬頃字子玉號古崖萬里弟歷守大郡所至以循廉
稱知南劍州內寬外明政教備舉以興學為第一義
嘗增置學田以助廩餼家居元兵至境委置私第冒
險難自都昌赴饒州兄所偕子鐸俱被執罵賊而死

人物志

陳大猷字文獻都昌人師雙峰饒氏歷仕至從政郎改

黃州軍判官著尚書集傳

人物志

李成大建昌人登進士德祐初知金壇郡元兵至與戰不勝吏民脅成大降乃潛與胡用存謀復金壇事泄繫獄榜掠不屈遂殺其二子以懼之終不屈笑曰子為父死臣為君死卒殺之詔贈直祕閣謚忠節

同上

陳畦字子從拒之子仕襄陽南漳尉調靖州判官魏了

翁薦之不就以通直郎致仕人壯其勇決祖孫相望

皆盛年納祿云

人物志

王時潛字源魯都昌人隱居不仕累辟皆辭附註禮記

士類宗之

同上

陳師愷字叔才都昌人專究理學纂述書經蔡傳旁通

行於世

同上

陳皓字可久大猷子生宋季不求聞達博學好古有禮

記集註行於世學者稱為經歸先生年八十有二卒

元奎章學士虞集題其墓

同上

元

高必達建昌人五歲時父棄家遠遊莫知所適必達既長晝夜哀慕乃娶妻以養母而歷徃四方求其父十餘年不得忽傳黃州全真道院中有虛明子者學道三十年矣本姓高氏建昌人也匿姓名為道人云必達詢問知為父即徃拜之具言家世及已之所生歲月大父母之喪葬始末因哀號叩頭不已虛明猶瞑

坐不顧久之斥曰我非汝父不去何為必達留侍左
右不少懈辭氣哀惻可矜其徒謂虛明曰師有子如
此忍弗歸乎虛明不得已乃還家必達孝養篤至鄉

里稱之

元史

按高必達林志訛載建昌府白志據史改正

葉清叟字澄心星子人博學工詩為隆興路儒學錄復
調南康嘗入廬山采藥遇異人授以竒方遂精於醫
子宗仁隱居教授學窮經史授白鹿書院山長遠近

宗之

林志

謝珪字西蟾建昌人宋丞相謝方叔四世孫至正間以

故官子孫授建寧路擢鹽茶提舉克稱厥職

林志

燕公楠字國材南康之建昌人宋禮部侍郎肅之七世

孫母雷氏夢五色巨翼入幃遂生公楠十歲能屬文

再貢於鄉不第後以連帥辟五遷至通判贛州事世

祖既平江南帥臣板授同知贛州事以平廣南功遷

同知吉州路總管府事召至上都奏對稱旨賜名賽

音囊嘉岱命叅大政辭乞補外除僉江浙行中書省
事俄移江淮尚書省就僉江淮行尚書省事江淮在
宋為邊陲故多閒田公楠請置兩淮屯田勸導有方
田日以墾除大司農領八道勸農營田司拜江淮行
中書省叅知政事僧格既敗而蠹政未盡去公楠赴
闕極陳其故請更張以固國本會欲易政府大臣以
問公楠公楠薦巴延布哈等十人又問孰可以為首
相對曰天下人望所屬莫若安通問其次曰諤勒哲可

明日拜諤暫為丞相以公楠及布哈為平章政事固
辭改江浙行中書省叅知政事三十年復為大司農
進河南行省右丞入覲成宗以公楠先帝舊臣慰勞
良至改遷湖廣行省右丞五年召還朝卒賻贈有加

特命朝臣護喪南歸

元史

余仁仲星子人至正間為贛州路知事時尚書噶海叅
政沁布阿咱爾守贛每與仁仲圖議軍事匡贊甚多
丁酉紅巾圍安慶仁仲言於尚書叅政曰安慶圍急

當移檄省憲合兵赴援無安慶則江右不可保既謀不用安慶陷仁仲歎曰國事去矣以疾辭官移家龍

興卒葬西山

府志

陳徵字明善廬山人居吳中嘗從吳澄游學務明理不慕榮進一時前輩若虞集揭傒斯咸推重之

江南流寓志

鄭佛生建昌人早孤母病孳貧無以為養日賣菜歸必為母盥櫛飼飲食扶掖上下掃除便溺二十餘年始

終弗怠事聞詔表其門

安志

按安志星子黃直周機黃虞亦皆以孝義著附錄
於此

黃異字民同灝之裔少好學讀書於白鹿書院至元進
士為廣東惠州學錄遷南安道源書院山長元季棄
官歸隱授徒自號節菴有節菴詩集三十卷子朋克

世其家學

同上

明

于光字大用都昌人少有大志初從徐壽輝署江東宣

慰及陳友諒弒壽輝光歸高帝拜行樞密院判從征
屢有功擢衛指揮從徐達平淮東浙西擒張士誠取
汴梁克陝洛下潼關佐都督郭興守之別擊破元左
丞李思齊軍徙守鞏昌庫庫特穆爾數犯邊屢却之
會庫庫偵知大將軍達南還遂襲圍蘭州指揮張溫
堅守光帥師援溫至馬蘭溪卒遇庫庫軍戰不勝被
執至城下令紿溫降光大呼曰吾不幸而擄且死公
等幸堅守大將軍將至矣元將怒殺光城中守益堅

園遂解上聞使使諭祭配享功臣廟

白志

陳汝秩字惟寅本廬山人父徵字明善居吳卒惟寅與弟惟允力貧養母有聞於時惟允為淮張所辟親信用事聲勢甚重惟寅安貧靜退不能卜一廛饒介之謀僦屋以居倪元鎮為作疏國初以人才徵至京以

母老辭歸

列朝詩傳

干立字彥威南康人學道會稽山中得石室藏書放浪

江湖間與顧仲瑛友善於玉山草堂有行窩焉

同上

劉誠字伯實都昌人洪武間以明經聘授河南新鄭教

諭所著有栢石集十卷

林志

余復升字文秩星子人洪武初以賢良薦授濟南章邱
丞總芻粟給大軍民不勞而事集累官至德州知州

同上

楊淞字公謹建昌人通五經洪武八年以經明行修舉

國子監助教陞祭酒

人物志

葉昭字子宣星子人通經術能文善隸古高尚氣節洪

武初聘為南康府學訓導尋以疾辭所著有樵什集
子二曰堅以孝廉薦累官刑部員外郎曰剛嘗割股

以孝行稱

林志

查琛字伯玉星子人器量宏遠讀書窺見大義與士大
夫講論古今人物歷歷皆有條貫洪武中以賢良徵
年老不赴其子桴字濟海永樂進士官至禮部祠祭
司郎中以孝友著自號潭隱建有龍潭書院
南康府舊志
廖敏字悅學星子人洪武中鄉薦選入內閣修永樂大

典任刑部主事宅心公恕猷獄明允為時所稱

林志

殷革星子人由監生歷官知松江府清慎自守政聲大著母喪服闋復知南雄時梅嶺險峻行者難阻乃募

民疏鑿通道至今便之致仕卒於家

人物志

黃維字叔經星子人永樂間由舉人任餘姚知縣政尚簡易務修學校民有健訟者遣入社學久之化為善士以母喪歸民計服闋先詣闕請復知餘姚六載考

績民脫履留之未至京卒

同上

袁容建昌人父洪以軍功授左軍都督容尚永安公主
成祖起兵容帥師援永平下雄縣取漢州攻真定命
還守北平經營調度應機決策繕修備禦屢立大功
永樂癸未錫誥券封奉天靖難推誠宣力武臣特進
光祿大夫駙馬都尉廣平侯食祿一千五百石子孫
世襲卒贈沂國公謚忠穆傳至成化子瑄嗣絕府志
魏源字文淵建昌縣人永樂進士除御史辨松江知府
黃子威誣奏減浙東瀕海漁課巡按陝西西安大疫

奏言諸府倉粟積一千九十餘萬石足支十年今民疫妨農請輸鈔代兩稅之半從之洪熙初陞浙江副使宣德三年召署刑部右侍郎河南旱荒民多轉徙命為左布政使發倉廩免逋賦雜役雨亦旋降歲大豐召還授刑部左侍郎奉命采木四川兼飾邊務未幾拜刑部尚書正統二年命往大同宣府督察諸將便宜從事源遣都指揮李謙守獨石楊洪副之劾指揮杜衡等抵大辟諸將肅然按行諸險要令將吏分

守增修開平龍門城皆甃以甃自獨石抵宣府增置墩堠免屯軍租一年儲火器為邊備諸依權貴避役者悉括歸伍邊務修飾還朝按問遼王貴烜事不稱旨與何文淵等繫詔獄累月釋還職八年致仕尋卒

白志

盧翰字邦臣星子人永樂進士改翰林院庶吉士與二十八宿之選修永樂大典歷代名臣奏議改吏部主

事

林志

余鼎字正安復升子永樂進士是科詔選天下文學之士二十八人以應列宿鼎與焉尋授翰林修撰博學能文與修聖學心法及高廟實錄晉侍講尋上章乞

歸鑿釣臺以自娛所著有南坡文集行世

人物志

張鑑字惟明建昌人永樂進士巡按陝西考察文武劾舞陽侯薛祿應城伯孫昌不法事糾冢鄉郭璉後出

為汝寧知府

同上

按正德十一年始析建昌置安義人物志以鑑為

安義人者訛又鑑同邑同榜有胡新者由御史歷

官按察使見明一統志

原跋

黃珏字重美異之子少端重勵行永樂戊子舉人為星

子訓導歷安東東阿教諭典陝右文衡才名為時所

重

同上

邵嵩字維嶽都昌人永樂進士任監察御史巡按遼東

風采著聞復按廣東以言事逆旨謫官因疾遂不仕

自號湖山居士有湖山集

同上

柳芳都昌人永樂進士歷官刑部郎中獄平恕陞湖
廣叅政尋調山西所至有政蹟時論歸之

明一統志

呂漢字朝宗星子人娶陳氏生一子早喪漢年二十餘
親族勸之再娶漢曰婦失夫理不容改節夫失婦義
猶是也況有子足繼宗嗣何再娶為年八十五而卒

林志

江福都昌人以祖壽征陳友諒有功授鎮武衛鎮撫洪
熙元年福襲祖職立功陞本衛指揮同知景泰元年

生擒叛臣喜寧陞後軍都督府都督

同上

劉衢星子人榮祖之子由鄉舉任長寧教諭性仁孝宣

德間舉家罹疾母將危求以身代一夕焚香願天割

股烹粥啖之母病瘥鄉人以劉孝子名之

明一
統志

梁崑星子人嘗罹疫癘舉家逃避弟病危衆諭使棄之

出避崑曰如崑去弟誰視湯藥竟不去人以友愛稱

之後由監生授建平訓導陞光山教諭卒於家

同上

葉瑾星子人少孤姿性英敏既長以詩領宣德乙卯鄉

薦歷儒官三十年所至訓迪有方人才輩出致仕卒

於家

同上

朱讓字克遜星子人景泰間由舉人授御史遇事敢言

不畏權勢出按廣東肅振百僚尋陞大理知府多惠

政以疾告歸卒於家

同上

黃暉字有融建昌人景泰進士授工科給事累陳章疏
奉使滿剌國授一品服色官至廣西僉事綽有政聲

府志

余濂字宗因都昌人弘治進士任監察御史立朝上章
有陳愚錄巡按遼東有安邊集後謫武進知縣尋叅

畫征勦蘇松海寇有功陞蘇州同知以母憂歸

林志

邵有道都昌人弘治進士歷官汀州知府築郡境以內
橋四十餘座復濠百餘丈上杭永定二縣每以糧米
致爭有道定之吏民俱服爭以永息在任四年五見

甘露郡稱大治擢雲南副使

福建名宦志

殷廷舉星子人由鄉舉任監利縣值大水至城野俱沒

廷舉遂大修諸堤計地任功費不繁而役不困明年夏鼉淵堤將陷豫與民約曰倘不幸堤陷或死或徙者將不可勝數民素樂為用即日城野負畚鍤者萬餘人不期而集須臾堤完復為月堤以障之性勤儉常衣一布袍夜分乃寐會澤中有盜千人廷舉知難征勦扁舟入其壘諭以禍福輒散去

湖廣名宦志

但啓元星子人以舉人知香山縣有惠政時鹽地日削竈丁逃亡者多額仍舊版至有一人而兼數丁者即

徙之他業仍責其課啟元憫之會清審鹽場丁口數
為力請得除竈民慶為更生

廣東名宦志

曹文英都昌人事父孝子珊繼父志母疾籲天請代嘗
母糞治療得痊父卒廬墓三年珊子必和事母葉氏
曲盡孝道父母卒俱廬墓三年勅建世孝坊

安志

按文英同邑詹介建昌杜春一姜來聘星子陶誌
陳家儀安義余大啟周雲騰俱以孝義見安志附
錄姓名於此

左敢星子人父母卒刻像無木憇道傍大樹下望之垂
泣葉遂落主人訝問伐木與之歸刻定省如生有司
以聞詔旌其門

同上

黃祺字惟德建昌人正德甲戌進士任吏部考功清查
積滯歷陞貴州按察使陞雲南布政從都御史毛伯

溫征勦安南乞歸恬退自守

人物志

徐相字文卿都昌人正德丁卯鄉薦任連州清苦自甘
苗寇逼連征勦有功陞僉事不就而歸連民舉祀名

宦

府志

陶尚德字祖容星子人正德中為諸生時會宸濠之變
守令學博棄城走尚德倡於衆曰先聖宮殿遷豆樂
器在焉寧死守濠去澤宮無恙登嘉靖進士授御史
有防邊漕糧茶稅諸疏為左都御史協吏部考察晉
少司空董築外羅城陞刑部尚書加太子太保一品
俸賜玉歸田杜門著賓廬藁鷗波亭集穆宗御極特
賜存問卒賜祭葬

人物志

周志偉安義人嘉靖進士任工部主事清理蘆課改釐
夙弊陞台州知府治河賑荒民建生祠歷四川兵備
副使彛苗服心番人塑像居家恬退所著有陽山集

及台州倡和集

同上

周希貴字子良安義人賦性剛方裊躬耿直初任石首
教諭陞井陘令尋陞麻哈知州抑制土官彛苗輸心
管大理銀廠稅革除萬金歷官二十餘載清介不易

府志

吳尚禮星子人嘉靖二年由監生除授歸善主簿蠻寇

入境尚禮奮不顧身督兵勦賊遂為所害

人物志

陶一貫字孔啟星子人由選貢除福建布政司理問退

休因寓白下聞倭賊潛入蘇松劫掠淮揚逼近留都

自赴軍門請師督討駐師吳江軍威大振次募兵海

上遇賊於淞江德清縣力戰而沒都御史譚綸并兩

院奏聞贈奉議大夫立廟崇祀

同上

熊儋字敬吾星子人為諸生時即棄舉子業潛心性學

授徒白鹿初與布衣章潢語未合後聞羅近溪得陽
明旨要徒步往南昌與語移時若合符契所著有易
經翼旨熊子庸言羅氏一貫編匡樵野詠等書同上

余經元字冠卿都昌人星子貢士居親喪毀瘠過禮兄
經魁困於賦經元鬻已產以佐兄嘗登白鹿講堂為
致知格物之學有義利辨性教志氣諸解天啟間郡
司理李仲達值璫餓羅獄經元質田得若干緡為諸

生倡義及卒黃石齋表其墓

府志

余應桂字二磯都昌人萬歷進士歷知武康龍巖海澄
三縣徵授御史戶部尚書畢自嚴殿試讀卷取陳于
泰為第一首輔周延儒姻也應桂劾其朋比行私已
復列上延儒貪邪傾險狀言納孫元化參貂則事皆
曲徇受楊鶴重賂則力主撫議他事干犯國法多類
此帝方眷延儒厚責應桂已而賊陷登州元化被執
應桂以元化貽禍封疆皆延儒曲庇所致復力攻之
帝怒貶三秩引疾歸崇禎七年還朝出按湖廣捐贖

鍏十餘萬金募壯士繕城治器明年賊漸逼承天應
桂身護獻陵乘城守禦期滿當代命再巡一年盧象
昇撫鄖陽紬軍需應桂貽以贖鍏萬五千象昇改撫
湖廣應桂頌其忠謀請昇重權令掃蕩羣賊已而象
昇赴汝雒賊老回回等走德安黃州應桂急檄大將
秦翼明拒擊而奏報屬城失事具以實聞期滿當代
復留巡撫王夢尹罷即擢應桂右僉都御史代夢尹
其冬總理熊文燦至廣布招降之令劉國能先降明

年春張獻忠亦降馬進忠西走馬光玉賀一龍李萬慶順義王九條龍等衆十餘萬盡萃於麻城黃安應桂分兵扼要害會光玉一龍乞降應桂遣使往諭而遣將擊順義王等於黃福店賊遂走黃安會文燦至麻城應桂請協擊不從賊復東走江北為左良玉所遏折而走廣濟斬水惟光玉一龍觀望不動已文燦檄諸道兵合擊賊於茶山賊於應桂所分地逸出文燦遂劾其後期誤軍兵部尚書楊嗣昌恨應桂曾劾

其父奏逮之應桂陳撫勦始末白已無罪而力詆文
燦不納逮至下獄初應桂慮獻忠反覆貽書文燦言
獻忠惡已有端可先未發圖之其書為獻忠邏者所
得獻忠牒鄖陽巡撫戴東旻言撫軍欲殺我語甚悖
東旻聞之文燦文燦遂再糾應桂以私書貽誤封疆
帝怒下法司并按應桂疏辨且言獻忠布賊孔道邀
劫公移總理噤不敢問奈何反據賊口誣臣帝亦不
納應桂竟遣戍已而獻忠反文燦伏誅東旻亦瘦死

獄中廷臣文章薦應桂督師孫傳庭戰沒命應桂兼
右僉都御史往代之應桂以無兵無餉入見帝而泣
帝但遣京軍千人護行給御用銀萬兩銀花四百銀
牌二百為軍前賞功之用而已應桂將至山西賊已
入其境逡巡不敢進帝責以逗遛奪職命新擢陝西
巡撫李化熙代之化熙亦不能進也未幾京師陷應
桂遂家居不出久之死於難

白志

徐大相字覺斯安義人萬曆進士授東昌推官稍遷國

子博士百僚將早朝中官盧受傳免衆趨出受從後
姍侮大相歸草二疏一論遼左事一論受奸邪時接
疏者即受也見遼事疏曰此小臣亦敢言事及帝閱
第二疏顧受曰此即論汝罪者受錯愕叩頭流血請
罪曰奴當死疏乃留中明年遷兵部主事調稽勲移
考功進驗封員外郎進士薛邦瑞為其祖蕙請謚大
相與尚書張問達議如其請熹宗方惡卹典冗濫鐫
大相三秩出之外大學士葉向高都御史趙南星等

連疏救乃改鑄二秩大相方候命羣奄黨受者數十輩持梃譟於門曰若猶戀此署耶搜大相橐止俸金七十兩乃鬩然散崇禎元年起故官歷考功文選奏陳遵明旨疏淹滯破請託肅官評正選規重掌篆崇禮讓勵氣節抑僥倖覈吏弊十事帝即命飭行故尚書孫丕揚等二十六人為魏忠賢削奪大相請復其官不許旋以起廢忤旨貶秩父憂歸卒於家

同上

熊德陽號清嶼建昌人萬歷進士授高明縣考選刑科

給事中天啟初差祭北鎮調外崇禎己巳起兵科給

事庚午副黃道周典試浙江

安志

徐孔徒字服子都昌人萬曆舉人授四川邛州牧在任

七載賢聲特著乙酉張獻忠陷城抗節死焉

人物志

但宗皋號陶村星子人天啟辛酉鄉薦任開化令歸休

杜門著述有廬山詩文二紀湖南講書太極圖說驢

背語

府志

熊士愷字仲高德陽次子事親能養志天啟鄉薦人稱

真孝廉焉有舟子失金誣其僕不辨輒倍數償之會館同舍有爭席者質於士愷立推已席委之同舍生慙更相讓其克已類如此

同上

涂君鼎號四極建昌人崇禎歲貢選贛州府學司訓丙戌吉州陷君鼎與諸生守贛謂其長子弘斌曰我與城亡邱壘可念勿以吾為憂城陷不屈死先是次子弘祐傷箭不起是日三子弘祉於解中以詈罵被殺妻熊氏弘祐婦熊弘祉婦李孫關生秀貞婢呂氏端

香輩並赴井死惟弘斌脫歸備識一門貞烈狀云物人

志

國朝

熊維典號約生建昌人明崇禎間兵科給事順治十四

年巡撫蔡士英按察李長春禮請主鹿洞書院教

白鹿

洞志

宋之盛字未有星子人明崇禎己卯以春秋薦赴禮部
試不第歸鄉里不入城市以講學為己任其學以明

道為宗以識仁為要於二氏微言與旨隨手箋訂抉
摘異同非如世之闢異論者舍精而攻其拙也與盱
江謝文洙為最契晚讀胡敬齋居業錄持敬工夫益
密少孤事兩兄如父戊申五月以疾卒同邑有查小
蘇者亦棄諸生山居不出年九十而終

陳其誠字獻赤安義人明崇禎間以選貢任行唐令剛
介不避勲貴吏民畏愛致仕歸林課農訓子順治丙
戌間有司敦請鄉飲大賓

縣志

徐碭字三連安義人順治辛卯舉人任湖廣益陽知縣
奉檄招撫叛逆吳三桂被害贈僉事予祭葬蔭一子

入監

安志

王廷憲字斌為安義人博學俊爽明崇禎壬午鄉薦康
熙丙午宰歙縣聞父喪瀝血辭職以新例奪情哀毀
骨立累章陳情終制乃得請抵家撫柩慟哭吐血數
斗逾年遂卒著有葛廬集家訓詩文行世

同上

干持字達士星子人南豐湯來賀主鹿洞極獎其文行

為及門冠閩撫張伯行聞其賢聘主鰲峯書院以衰
老未就自為諸生歷試冠軍僅以貢終以子建邦貴

封文林郎著有志道編

白志

干建邦字淑掌特子康熙庚辰進士宰舞陽時值大澇
甫下車惻然不待詳允即先發貯粟民賴以活復舞
泉書院置田聚書豫有蝗獨不入舞陽境上官異之
以外艱去民懷德立祠先是需次家居當事聘主鹿
洞父子繼居講席著有鹿洞續言及湖山堂集

同上

李夢蘭建昌人負勇略耿逆叛夢蘭招集義勇保障地
方以功授同知銜尋知雲南楚雄縣兵亂後累歲逋
賦甚多民無以供力請大吏疏題豁免以孫鳳翥貴

贈通議大夫

李光地傳

周倬建昌諸生族有以貧鬻妻者倬力助之得完聚火
及倬居父柩在堂倬哀號顛救乃返風獲免人以為

孝感焉

崇祀錄

王廷實安義諸生性孝父喪明廷實舐之而開執親之


喪哀慕三年閩寇犯境聯鄉勇搗賊巢邑賴以安卒

祀鄉賢

同上

按安志所載安義王家衡星子詹學閔俱以孝義

稱附志於此



江西通志卷九十一

欽定四庫全書

史部

江西通志卷九十二

詳校官監察御史臣范袁

檢討臣德生覆勘

總校官知縣臣楊懋珩

校對官中書臣石鴻翥

謄錄監生臣包文訓

欽定四庫全書

江西通志卷九十二

人物

九江府

晉

翟湯字道深尋陽人篤行純素仁讓廉潔不屑世事耕
而後食人有餽贈雖釜庾一無所受永嘉末寇害相
繼聞湯名德皆不敢犯司徒王導辟不就隱於縣界

南山始安太守干寶與湯通家遣船餉之勅吏云翟公廉讓卿致書訖便委船還湯無人反致乃貨易絹物因寄還寶寶益歉愧焉咸康中征西大將軍庾亮上疏薦之徵為國子博士湯不起建元初庾翼北征石季龍大發僮客以充戎役勅有司特蠲湯所調湯悉推僕使委之鄉吏吏奉旨不受湯依所調限放免其僕使令編戶為百姓康帝復以散騎常侍徵固辭老疾不至年七十三卒於家

晉書

翟莊字祖休以孝友著名遵父湯之操不交人物語不
及俗惟以弋釣為事及長不復獵或問曰獵漁是害
生之事先生止去其一何哉莊曰獵自我釣自物未
能頓盡故先節其甚者時人以為知言晚節亦不復
釣端居華門歆菽飲水州府禮命及公車徵並不就
子矯亦有高操屢辭辟命矯子法賜孝武帝以散騎
郎徵亦不至世有隱德云

同上

周訪字士達本汝南人漢末避地江南至訪四世吳平

因家尋陽訪少沈毅果於斷割為縣功曹時陶侃為散吏相與結友察孝廉除郎中上甲令皆不之官元帝渡江命叅鎮東軍事尋以為揚烈將軍領兵屯尋陽鄂陵與甘卓趙誘討華軼軼將周廣燒城以應軼衆潰執而斬之遂平江州以訪為尋陽太守復命與諸軍共征杜弼弼遣其將張彥陷豫章王敦時鎮溢口遣李恒受訪節度與彥交戰訪率帳下將李午等臨陣斬彥賊遂退歸湘州訪復以舟師造湘城軍達

富口而殲遣杜弘出海昏時湓口騷動訪步上柴桑
與賊戰斬首數百賊退保廬陵已而突圍出奔於臨
賀又進訪龍驤將軍豫章太守賜爵尋陽縣侯時梁
州賊帥杜曾等引兵向江陵經造沔口大為寇害元
帝命訪擊之訪有衆八十進至沌陽遣李恒督左甄
許朝督右甄訪自領中軍高張旗幟曾果畏訪先攻
左右甄訪令其衆曰一甄敗鳴三鼓兩甄敗鳴六鼓
自旦至申兩甄皆敗訪聞鼓音選精銳八百人自行

酒飲之勅不得妄動聞鼓乃進賊未至三十步訪親
鳴鼓將士皆騰躍奔赴曾大潰遂定漢沔以功遷梁
州刺史屯襄陽務農訓卒威風既著遠近悅服智勇
過人為中興名將慨然有平河洛之志聞王敦有不
臣之心訪恒切齒敦雖懷逆謀終訪之世未敢為非
初訪遇善相者謂訪與陶侃曰二君皆位至方嶽功
名略同但陶得上壽周當下壽耳侃小訪一歲卒時
年六十一謚曰壯二子撫光

同上

周撫字道和彊毅有父風元帝辟為丞相掾襲爵除鷹
揚將軍武昌太守王敦用為從事中郎與鄧嶽俱為
爪牙敦敗撫與嶽亡走西陽蠻中明年詔原敦黨嶽
撫詣闕請罪有詔禁錮之咸和初司徒王導以撫為
從事中郎出為寧遠將軍江夏相蘇峻作逆撫從溫
嶠討之峻平遷監沔北軍事南中郎將鎮襄陽尋遷
豫章太守益州刺史永和初桓溫征蜀進撫督梁州
之漢中巴西梓潼陰平四郡軍事鎮彭模擊破蜀餘

寇以功遷平西將軍隗文鄧定等復反立范賁為帝
有衆一萬撫擊破斬之進爵建城縣公征西督護蕭
敬文作亂殺將軍楊謹據涪城自號益州牧桓溫令
梁州刺史司馬勲等會撫伐之敬文固守自二月至
八月乃出降撫斬之傳首京師升平中進鎮西將軍
在益州三十餘年卒贈征西將軍謚曰襄子楚嗣同上
周光少有父風年十一見王敦敦謂曰貴郡未有將誰
可用者光曰明公不恥下問竊謂無復見勝敦以為

寧遠將軍尋陽太守及敦舉兵光率千餘人赴之既至敦已死王應祕不言光遽見其兄撫曰王公已死兄何為與錢鳳作賊衆並愕然其夕衆散錢鳳走出至闔廬洲光捕鳳詣闕贖罪蘇峻作逆隨温嶠力戰有功賜爵曲江男卒官

同上

周楚字元孫起家叅征西軍事從父入蜀拜鷹揚將軍捷為太守父卒以楚監梁益二州假節襲爵建城公世在梁益甚得物情時梁州刺史司馬勲作逆楚與

朱序討平之太和中蜀盜李金銀廣漢妖賊李宏並聚衆為寇楚遣其子討平之卒謚曰定子瓊勁烈有將略歷數郡代楊亮為梁州刺史建武將軍領西戎校尉氏人竇衝反欲入漢川安定人皇甫釗京兆人周勲等謀納衝瓊密知之收釗勲等斬之尋卒子虓

嗣

同上

周虓字孟威少有節操州名為祭酒歷官梓潼太守寧康初苻堅將楊安寇梓潼虓固守涪城遣步騎數千

送母妻從漢水將抵江陵為堅將朱彤邀而獲之虓遂降於安堅欲以為尚書郎虓曰老母見獲失節於此母子獲全秦之惠也雖公侯之貴不以為榮况郎任乎堅乃止每入見堅輒箕踞而坐呼為氏賊堅黨以虓不遜屢請除之堅待之彌厚後與堅兄子苞謀襲堅事泄堅引虓問狀虓曰昔漸離豫讓燕智微臣猶漆身吞炭不忘忠節况虓世荷晉恩豈敢忘也生為晉臣死為晉鬼復何問乎堅曰今殺之適成其名

徙太原後堅復陷順陽魏興獲二守皆執節不撓堅
歎曰周孟威不屈於前丁彥遠潔已於後吉祖沖不
食而死皆忠臣也虓竟以病卒於太原其子興迎喪
冠軍將軍謝元親臨哭之上疏表其厲節寇庭嬰禍
荒裔雖蘇武之賢不復過也贈龍驤將軍益州刺史

贍賜其家

同上

陶淡字處靜太尉侃之孫幼孤好導養之術謂仙道可
祈年十五六便服食絕穀不婚娶家累千金僮客百

數淡終日端拱曾不營問頗好讀易善卜筮於臨湘
山中結廬養一白鹿以自偶親故有候之者輒移渡
澗水莫得近之州舉秀才淡聞轉逃羅縣埤山中終
身不返莫知所終

同上

按陶淡人物志不載林志以入九江而晉書本傳
不言何許人今姑從之林志又訛以皇甫謐謝靈
運為潯陽人考諸史傳謐安定人靈運陳郡人也

今皆削去

原跋

南北朝

漁父不知其姓名太康孫緬為尋陽太守逍遙渚際見
一輕舟凌波隱顯俄而漁父至神韻蕭灑垂綸長嘯
緬問有魚賣乎漁父笑而答曰其釣非釣寧賣魚者
乎緬遂褰裳涉水謂曰竊觀先生有道者何晦用
若是漁父曰僕山海狂人不達世務未辨賤貧無論
榮貴乃歌曰竹竿籊籊湖水泔泔相忘為樂貪餌吞
鈎非夷非惠聊以忘憂於是悠然鼓棹而去

南史

陶淵明字元亮潯陽柴桑人曾祖侃晉大司馬淵明少
有高超博學善屬文嘗著五柳先生傳以自況時人
謂之實錄親老家貧起為州祭酒不堪吏職少日自
解歸州名主簿不就躬耕自資遂抱羸疾江州刺史
檀道濟往候之偃卧瘠餒有日矣道濟謂曰賢者處
世天下無道則隱有道則至今子生文明之世柰何
自苦如此對曰潛也何敢望賢志不及也後為鎮軍
建威叅軍謂親朋曰聊欲弦歌以為三徑之資可乎

執事者聞之以為彭澤令公田悉令吏種秫妻子固請種秔乃使二頃五十畝種秫五十畝種秔歲終會郡遣督郵至縣吏請求帶見之淵明歎曰吾豈能為五斗米折腰向鄉里小兒即日解綬去江州刺史王弘欲識之不能致也淵明嘗往廬山弘命淵明故人龐通之齋酒具於半道栗里之間邀之淵明有脚疾使一門生二兒舁籃輿既至欣然便共飲酌俄頃弘至亦無迂也先是顏延之在潯陽與淵明情款後為

始安郡經過潯陽日造淵明飲焉臨去留二萬錢與
淵明淵明悉遣送酒家稍就取酒嘗九月九日出宅
邊菊叢中坐久之忽值弘送酒至即便就酌醉而歸
淵明不解音律而蓄無弦琴一張每酒適輒撫弄以
寄其意貴賤造之者有酒輒設淵明若先醉便語客
我醉欲眠卿可去其真率如此郡將嘗候之值其釀
熟取頭上葛巾漉酒漉畢還復著之其妻翟氏亦能
安勤苦與夫同志自以曾祖晉世宰輔恥復屈身後

代自宋高祖王業漸隆不復肯仕元嘉四年將復徵
命會卒時年六十三世號靖節先生

梁蕭統集

按靖節先生晉書宋書南史各有傳晉書云陶潛
字元亮宋書則曰陶潛字淵明或云淵明名元亮
南史因之又以淵明為深明與昭明太子所撰本
傳皆不同蓋晉書南史成於唐人之手其諱淵固
宜若休文與昭明同時去陶世且甚近何名與字
亦復參差互異竊所未解人物志以為在晉名淵

明入宋改名潛似為得之

原跋

張野字萊民居潯陽柴桑與淵明有婚姻契學兼華梵
尤善屬文性孝友田宅悉推與弟一味之甘與九族
共州舉秀才南中郎府功曹州治中徵拜散騎常侍
俱不就依遠公習淨業及遠公卒為序稱門人世服
其義義熙十四年與家人別入室端坐而逝年六十
九族子詮字秀碩尚情高逸酷嗜典墳雖耕鋤猶帶
經不釋徵散騎常侍不起庾悅以其貧起為潯陽令

笑曰古人以容膝為安若屈志就祿何足為榮乃入廬山依遠公研窮釋典深有悟入宋景平元年無疾而逝春秋六十五

蓮社高賢傳

周羅睺字公布九江尋陽人年十五善騎射任俠放蕩收聚亡命陰習兵書仕陳為句容令從吳明徹與齊師戰於江陽為流矢中左目躍馬突進斬首不可勝紀進師徐州與周將梁士彥戰於彭城勇冠三軍以功封始安縣伯總檢校揚州中外諸軍事賜金銀三

千兩盡散之將士陳宣帝深美之出為晉陵太守進
爵為侯使持節都督豫章十郡諸軍事豫章內史獄
訟庭決不關吏手人懷其惠立碑頌德至德中都督
南州江州司馬吳世興密奏羅暉擁衆嶺表意在難
測蕭摩訶等保明之除太子左衛率時參宴席詩每
前成都官尚書孔範曰羅暉執筆製詩還如上馬入
陣不在人後自是益見親禮及隋伐陳羅暉督軍以
拒及陳主被擒上江猶不下晉王廣遣陳主手書命

之羅睺與諸將大臨三日放兵士散乃降高祖慰諭之許以富貴羅睺垂涕對曰本朝淪亡臣無節可紀陛下所賜獲全為幸富貴非所望帝甚器之拜上儀同三司鼓吹羽儀送之於宅歷幽涇二州刺史開皇十八年征遼東徵為水軍總管自東萊泛海趣平壤城遭風船多漂沒無功而旋突厥犯塞從楊素致討羅睺先登大破之進大將軍賜爵義寧郡公煬帝即位授右武侯大將軍副楊素討平漢王諒進上大將

軍及陳主卒羅睺請一臨哭許之衰經送至墓葬還
釋服然後入朝世稱其有禮時諒餘黨據絳晉等三
州詔羅睺進兵圍之中流矢卒送柩還京行數里輿
馬自止策之不動有風旋遠焉絳州長史郭雅稽首
祝曰公恨小寇未平耶尋即殄滅無為戀恨是時風
靜馬行見者莫不悲歎其年七月子仲隱夢羅睺曰
我明日當戰其靈坐所有弓箭刀劍無故自動若人
帶持之狀絳州城陷是其日也贈柱國右翊衛大將

軍謚曰壯子仲安位上開府

北史

唐

陶峴潛之裔孫開元中移居崑山與孟彥深孟雲卿焦
遂游嘗製三舟一自載一供賓客一置飲饌有女樂
一部奏清商之曲逢林泉則窮其景物吳越之士謂
之水仙其西塞山下回舟詩有云匡廬舊業是誰主
吳越新居安此生白髮數莖歸未得青山一望草還

成

全唐詩話

陳伯宣陳宜都王之後避難泉州與馬總善注司馬遷
史記行於世後遊廬山居德安以著作佐郎名不起
大順初卒子崇為江州長史益置田園為家法僖宗
時嘗旌其門南唐又為立義門免其徭役

史傳

鄭良德安人江州刺史鄭善果之孫也貞觀初善果官
江州政教洽敷愛民興學號為清吏卒於官因家焉
良樂道不仕嘗與其子誼公登紫巖峰觀敷淺原有
白鹿躍於馬前語諸子曰吾家禮義相傳後必蕃昌

吾百年後可葬於此乃名其隴曰孝志阪曰萬家後
子孫果蕃衍析居江州者千有餘家

安志

後五代

周勅瑞昌人天祐初亂勅以勇敏應江西防遏使司徒
鍾傳表補江州軍總管陞御史中丞領尚書事時羣

雄割據無敢窺江淮者勅之功居多

林志

江夢孫字聿修潯陽人烈祖輔吳表為祕書郎夢孫自
言迂儒無裨益欲小試於治民求為縣令乃補天長

令烈祖先持告身示之曰今日受此明日趨走庭下
矣曰此素志也庸何傷及至天長吏白縣署正寢有
淫厲不可居夢孫不從是夕果有怪並出夢孫起焚
香曰受命為令當治事於此鬼神有祠廟邱壟何不
各歸其所語訖皆斂迹夢孫治縣寬簡吏民安之逾
年棄官還家事繼母盡孝為諸生講禮釋經義凡至
疑處輒斂衽曰此科先儒猶多異同夢孫安敢輕言
諸君自擇所長可也南唐保大中卒年八十五贈國

子司業

陸游南唐書

陳褒江州德安縣人唐給事中京之後十世同居長幼七百餘人不置奴婢日會食堂上男女異席未冠笄者又為一席畜犬百餘共以一船貯食飼之一犬不至羣犬皆不食築書樓延四方學者鄉鄰化其德獄訟為之衰息昇元初州以聞復徭役表門閭同上

宋

夏承皓字靈石德安人太宗時上平晉策遷右侍禁契

丹內寇承皓由間道發兵與契丹遇戰沒於河朔褒

贈崇儀使

人物志

馬適湖口人祖良俊葬僕頭山讖言沙洲圓出狀元已而生適慧悟勤敏嗜學建隆二年以文學高等擢進士第一人母篤孝母卒居廬毀瘠卒於家

府志

許祚江州德化人八世同居長幼七百八十一口太平興國七年旌其門閭淳化二年本州言祚家春夏常乏食詔歲貸米千斛同邑范芸軒五世同居元貞間

詔復其家

安志

陳兢江州德安人陳宜都王叔明之後十三世同居長幼七百口不畜僕妾上下端睦人無間言建書樓於別墅延四方之士肄業者多依焉鄉里率化爭訟稀少開寶初平江南知州張齊上請免其徭役昉弟之子鴻太平興國七年江南轉運使張齊賢又奏免雜科兢即鴻之弟淳化元年知州康戩又上言兢家常苦食不足詔本州每歲貸粟二千石後兢死其從父

弟旭每歲止受貸粟之半云省嗇而食可以及秋成屬歲儉穀貴或勸其全受而糶之可邀善價旭曰朝廷以旭家羣從千口軫其乏食貸以公粟豈可見利忘義為罔上之事乎至道初遣內侍裴愈就賜御書還言旭家孝友儉讓近於淳古太宗嘗對近臣言之叅知政事張洎對曰旭宗族千餘口世守家法孝謹不衰閨門之內肅於公府且言及旭受貸事上以遠民義聚復能固廉節為之歎息大中祥符四年以旭

為江州助教旭卒弟蘊主家事天聖元年又以蘊繼為助教蘊卒弟泰主之泰弟度太子中舍致仕從子

延賞可並舉進士延賞職方員外郎

宋史

夏竦字子喬父承皓與契丹戰沒於河朔竦以死事恩授丹陽簿上書乞應制舉擢光祿寺丞遷右正言真宗幸亳州為東京留守推官仁宗封慶國公宰相王旦薦竦才命教慶國公書未幾同修起居注是時君臣爭言符瑞竦獨抗疏以為不可出知襄州歲饑全

活數萬人歷洪州洪俗信巫竦索部中得巫一千九
百餘家毀其淫祠以聞朝廷詔江淮以南皆嚴禁絕
天聖中因王欽若圖進取復知制誥累遷尚書左丞
元昊叛拜陝西經略使徙判河中召拜樞密使以諫
官御史言遂罷又數年召以為相制下而言者又謂
竦與陳執中不協不可共事遂改樞密封英國公皇
祐元年改封鄭國公卒贈太師賜謚文正考功以竦
行不應謚改曰文莊

東都
事略

按竦始則諫止符瑞繼為玉清昭應宮判官輒附會神怪僥倖取進迹其生平純疵互見當時至以姦邪目之似乎近苛若舊志及豫章書稱揚太過又未免失實今從史傳節存其概云

原跋

胡旦德安人父清娶義門陳氏生旦咸平間進士累遷兵部郎中直祕閣五世孫清紹興十三年授羽衛大夫貴州防禦使有茂績於民封武功縣開國男食邑

三百戶

府志

羅或景德中扈駕親征至澶淵與宰相參議軍務上遣

或使邊賜以紫金帶還鄉領本貫江州刺史

人物志

陳弼字公順德化人祥符八年進士及第歷常州團練
推官補武安節推時侍御李偕守武安事倚弼決凡
二十四獄人皆服其平用薦改著作佐郎知廬陵縣
先是樞密副使姜遵嘗為廬陵民德之至是有前姜
後陳之諺移知資州通判潭州時溪蠻犯約知州事
劉夔劉沅繼出行徼弼內修民事外奉師費凡輸粟

帛金錢四十八萬兵械稱之用足於軍而賦役不加於民歷知撫州蜀州蘄州所至有惠政以目疾請老英宗即位遷祕書監性好學聲音星歷之技無所不

知曾南豐集

按陳巽林志失載人物志以為星子人今據曾子

固所撰神碑改入九江

原跋

王韶字子純江州德安人舉進士調建昌軍司理叅軍因客遊西邊時神宗初立韶內知天子智勇有志於

天下乃上平戎策曰國家欲制西夏當復河湟河湟復則西夏有腹背之憂自唐乾元以後吐蕃陷河隴至今董氊不能制諸羌而人自為部莫相統一宜以時并有之以絕夏人之右臂凡數千言神宗覽而竒之召問方略以為秦鳳路經略司機宜文字親帥數騎直抵青唐渭源諸羌帳中招諭之且留宿以示不疑青唐渭源皆遣其族隨韶歸附改保平軍節度推官名對因言營田互市之利從之改提舉鳳翔西京

節度使兼管營田市易公事熙寧三年詔奏墾田數知秦州李師中言其不實奪一官既而加太子中允祕閣校理五年改古渭砦為通遠軍以韶兼知軍會木征度洮來寇韶語諸將曰若官軍至武勝則抹邦山可一舉而定即趨武勝遇木征首領瞎藥等與戰破之遂城武勝賜名鎮洮軍復遣將擊破木征木征走弟結吳延征舉其族二千餘人并大首領李蘭羶等出降陞鎮洮軍為熙州以熙州洮岷州通遠軍為

一路即熙州為帥府進韶龍圖閣待制知熙州行軍
五十四日涉千八百里復州五辟地東西千里斬首
三千餘級獲牛羊馬以萬計以功遷端明殿學士兼
龍圖閣學士左諫議大夫入覲進資政殿學士兼制
置涇原秦鳳軍馬糧草韶還至興平會知河州景思
立出兵踏白城敗績賊圍河州韶曰賊所以圖河州
者恃有外援也今知救至必設伏以待我不若以兵
直趨定羌遣將破耳金欺當二族進次寧河分兵討

南山羌賊賊失援驚潰初思立輕敵覆軍賊勢復振而京師風霾旱灾連仍論者欲棄河湟神宗為之旰食數遣中使戒韶駐熙州持重勿出及是捷聞神宗大喜賜韶嘉之韶還熙州遣將以兵循西山出踏白後賊黨望風奔潰斬獲甚衆於是木征請降進觀文殿學士禮部侍郎七年拜樞密副使以母老丐外任除觀文殿學士戶部侍郎知洪州以表謝上御史蔡確言其罔慢落職知鄂州久之還舊職復知洪州卒

年五十二謚曰襄敏子厚為將有功端徽宗時為顯謨閣待制竊嘗著作東觀後為兵部侍郎以左道誅

東都事略

李受德化人為太子少保乞歸廬山哲宗詔王珪司馬光呂公著等餞飲於資政堂賦詩以贈之其弟東之以經筵官乞歸詔亦命珪等餞送如受當時以比二

疏云

林志

王厚字處道少從父韶兵閒習羌事以父任為大理評

事後以文易武為禮賓副使佐熙河帥府會吐蕃種
落亂其王瞻征隴拶爭國厚與河州守將王瞻欲招
徠羌人復故地師出塞下邈川諸城瞻征以其屬來
降厚次青唐隴拶擁萬騎出迎遂定青唐元符末湟
鄯不守厚坐貶崇寧初復故官自湟鄯棄畔羌多羅
巴等迎隴拶之弟曰溪賒羅撒復國朝廷賜隴拶姓
名曰趙懷德令還邈川溪賒羅撒之黨謀掩殺之懷
德懼奔河南議者謂諸羌連結且生邊患朝廷方謀

鎮輯而大臣有薦厚者賜對命知河州兼經略使厚請擇人以自助遣童貫與偕至乃如京玉關厚請進兵邈川與諸將分部而進於是高永年為統制官以兵三萬出京玉厚以兵三萬出安鄉多羅巴結連鄴郭兵衆未會使其三子以數萬人據險自守進擊敗之俱遁進至湟州攻三日拔之以功拜威州團練使帥熙河溪巴溫之妻大掌牟率諸部籍土地請降三年厚命高永年以左軍循宗水張誠以右軍出宗谷

厚以中軍出綏遠會於宗哥川溪賒羅撒置陳倚北
山厚以中軍登山攻其背自督強弩迎射之賊大敗
溪賒羅撒以一騎馳去未至鄯州五里偽國主龜茲
公主冑宜結牟及大酋李阿溫率衆開門降更鄯州
曰西寧州拜武勝軍留後以牽制夏人坐逗留降鄯
州防禦使初大掌牟之入見也徽宗親撫諭使歸而
誘致其子至是趙懷德遣使約降猶豫未決厚以書
諭之懷德遂送款復武勝軍留後還朝提舉中太一

宮卒贈寧遠軍節度使謚曰莊敏

東都事略

王寓

一作寓

字元忠江州人父易簡資政殿學士寓歷校

書郎著作佐郎度支員外郎兼充編修官國子司業
為起居舍人改中書舍人兼蕃衍宅直講欽宗立以
給事中命兼邇英殿經筵侍講轉吏部侍郎陞禮部
尚書翰林學士康王之使金也以寓為尚書左丞副
之乞免貶單州團練使建炎中敵兵進破江州被害

林志

張夢祥彭澤人宣和進士欽宗北行夢祥被執不屈金

主義而釋之退隱仁磯終身不仕號曰仁山先生

同上

陳士尹字彥衡德安人建炎初與武寧李彥先同應詔

勤王時號三將軍在軍中十五年忠義激烈奮不顧

身與金人鏖戰屢奏功後與李彥先同沒於陣事聞

贈保義郎淮西統制兵馬使勅立碑祀之

人物志

連萬夫德安人補將仕郎建炎四年羣賊犯應山萬夫

率邑人數千保山砦賊不能犯寇浪子者以兵至圍

之三日卒破之賊知萬夫勇敢有謀欲留為用萬夫怒厲聲罵賊為所害贈右承務郎官其家一人

宋史

王阮字南卿江州人父彥傳靖康勤王有功阮少好學尚氣節自稱將種嘗謁袁州太守張栻栻謂曰當今道在武夷子盍往求之阮見朱子於考亭與語大說之登隆興元年進士時孝宗初即位有詔經理建業以圖進取而大臣弼懦幸安計未決阮試禮部對策曰臨安蟠幽宅阻面湖背海膏腴沃野足以休養生

聚其地利於休息建康東南重鎮控制長江呼吸之間上下千里足以虎視吳楚應接梁宋其地利於進取建炎紹興間敵人乘勝長驅直擣而我師亦甚憊上皇遵養時晦迺駐臨安所以為休息計也主上獨見遠覽舉而措諸事業非固以臨安為不足居也戰守之形既分動靜進退理異也今東南王氣鍾在建鄴長江千里控扼所會輟而弗顧退守幽深之地若將終身焉如是而曰謀國果得為善謀乎古人有言

千里之行起於足下人患不為爾知貢舉范成大得而讀之嘆曰是人傑也調南康都昌主簿以廉聲聞移永州教授獻書闕下請罷吳楚牧馬之政而積馬於蜀茶馬司以省往來綱驛之費歲時分牧之資凡數千言紹熙中知濠州請復曹瑋方田修種世衡射法日講守備與邊民親訪北境事宜終阮在濠金不敢南侵改撫州韓侂胄宿聞阮名持命入奏夜遣密客詣阮阮不答私謂所親曰吾聞公卿擇士士亦擇

公卿劉歆柳宗元失身匪人為萬世笑今政自韓氏
出吾肯出其門哉陛下對畢拂衣出關侂冑大怒批旨
予祠阮於是歸隱廬山盡棄人間事從容觴詠而已

嘉定元年卒

宋史

權安節字信之九江人知臨江軍時江水齧岸多至傾

圯安節請於朝得緡錢若干重築之民甚賴焉

林志

蔡元思德安人朱文公守南康時講學於白鹿洞元思
從之遊隱居求志樂道不仕文公沒心喪三年又以

事文公者事黃直卿而卒業焉晚與同門數人每季月一集以相切磋如此者三十年州閭服行其化

人物

按蔡元思事詳見虞道園蔡氏義學記

周舜弼瑞昌人與弟亨仲從子仿嘗從朱子講學於白鹿洞立身行己一以聖賢為師朱門號稱高弟隱居

不仕

同上

高天錫字竹澗彭澤人宋季嚴禁道學考亭之學幾廢

天錫獨究心審華實辦理欲往來白鹿洞學者咸敬
信之卒之日俄云我欲還造化舊物矣奄然而逝後

祠鄉賢

安志

吳元字季誠德安人開禧元年與其弟宏愈三人同舉
進士元官知制誥累贈正議大夫宏字季剛官饒州
司戶愈字季謙初尉信陽金人圍信陽守令皆避去
愈獨嚴兵禦之以帛十餘丈作大旗一特題吳愈二
字敵衆望見不測遂舍之去歷官沿江制置使兼知

鄂州人直翰苑官兵部侍郎卒贈光祿大夫少師謚

文肅

林志

吳革字時夫元子三領舉於漕肄業白鹿書院任撫州

崇仁尉累官文華閣學士沿江制置使江東安撫知

建康府兼淮西總領每以崇正學基化本宣德達情

為已任卒贈光祿大夫謚清惠

人物志

王登字景宋德安人少讀書喜古兵法慷慨有大志不

事生產淳祐四年舉進士調興山主簿賈似道檄修

江陵城條畫有法制置使李曾伯經理襄陽登在行
尋以母憂去及吳淵為制置使邊事甚亟憶登才略
具書帛招之登方與客奕發書衣冠拜家廟長揖出
門問牛幾何可盡發犒師淵慨然曰事亟矣柰何登
曰亟呼諸將共議衆至驩躍曰景宋在此淵曰汝輩
欲西門出景宋欲從方城如何衆曰惟命登曰用兵
患不一登書生不過憑軾觀戰請五大帥中擇一人
為節制淵曰請監丞出正為此也即書銀牌曰監丞

代某親行將士用命不用命賞罰畢具登至沙市椎牛釃酒得七千人誓曰登與諸將義同骨肉今日之事登不用命諸將殺登以獻主帥諸將有一不用命登有制劄在不敢私也衆股慄聽命竟立奇功於沮河趙葵為制置使見登握手曰景宋一身膽惜相見晚也俾參宣撫司兼京西兩節馬光祖為制置使辟充參謀官遷軍器少監京西提點刑獄開慶元年提兵援蜀約日合戰夜分登經理軍事忽絕倒五藏出

血俄而卒

宋史

顏希孔彭澤人為本縣簿宋末元師南下取安慶江州

希孔率民兵八百人大聚舟楫各載石萬計戰於江

中飛石四擊敵舟幾敗已而石盡力屈被害民為葬

其骨於鳳凰山麓

人物志

戴羽德安人隱居積學徵辟皆不就著武侯通傳三卷

史評一卷虞道園為之序

明一統志

元

趙復字仁甫德安人太宗命太子濶出帥師伐宋德安以嘗逆戰其民數十萬皆俘戮無遺時楊惟中行中書省姚樞奉詔即軍中求儒道釋醫卜士凡儒生掛俘籍者輒脫之以歸復在其中以九族俱殘不欲北因與樞訣樞恐其自裁留帳中共宿既覺月色皓然惟寢衣在遽馳馬周號積屍間無有也行及水際則復已被髮徒跣仰天而號欲投水而未入樞曉以徒死無益隨吾而北必可無他復強從之先是南北道

絕載籍不相通至是復以程朱所著諸經傳註盡錄以付樞自復至燕學子從者百餘人世祖在潛邸嘗召見問曰我欲取宋卿可導之乎對曰宋吾父母國也未有引他人以伐吾父母者世祖因不強之仕惟中聞復議論始嗜其學乃與樞謀建太極書院立周子祠以二程張楊游朱六君子配食選取遺書八千餘卷請復講授其中復以周程而後其書廣博學者未能貫通乃原羲農堯舜所以繼天立極孔子顏孟

所以垂世立教周程張朱氏所以發明紹續者作傳
道圖而以書目條列於後別著伊洛發揮以標其宗
旨朱子門人散在四方則以見諸登載與得諸傳聞
者共五十有三人作師友圖以寓私淑之志樞既退
隱蘇門乃即復傳其學由是許衡郝經劉因皆得其
書而尊信之北方知有程朱之學自復始

元史

柳從龍字雲卿九江人志行卓然年長於吳草廬而學
於吳家闈閫之中築精舍曰靜虛晨省之暇飽玩聖

賢之書草廬為作靜虛精舍記

據吳文正公集改撰

李時彭澤人母病思魚羹攜筌求於港終日弗得俄有一叟過問知其意導之曰此宜舉筌遂得鯉奉母病

乃痊

安志

按安志江州范士奇亦以孝稱附志於此

甘楚枋德安人學通五經有盛名於世元興以明經舉進士楚枋屢為江浙湖廣河南行省典試官稱為得

人後官武岡縣令

府志

吳觀字賓天宏子兩試漕舉世濟其美至元間知分寧
縣括私帑置田數百畝立存惠倉以賑貧民去後民
為立祠累官朝請大夫湖廣提刑兼知衡州轉江西
提刑兼知贛州又轉江東提刑知饒州皆有政聲人
志

劉受二五柳鄉人至正間以貢任池州府推官張士誠
倡亂受二戰於城西渡口敗績衆皆逃受二還城死
守城陷不屈死之

同上

明

黃信彭澤人歲貢入監洪武末任湖廣道御史歷廣西按察使晉湖廣布政使至右副都御史剛方不屈深得紀綱之體論彭澤德望者信為首稱云

人物志

劉隆字尚文彭澤人洪武中由監生擢廣州府同知勤於政事晉福建參議俄轉廣西閩之士庶上疏懇留遂陞福建按察使巡視海道備倭甚整在官三十餘

年操守如一

分省人物志

孫復字明德九江人元至正間隨其父掾廬陵日從經師學士遊比壯通春秋大義壬辰春蘄兵倡亂首陷江州乃與其兄亡走池州王師自建康分遣總制何文輝將兵取池州所至施恩著信民稍稍來附尤極意搜延士類或以復見與語竒之即留置幕下巳亥從守龍江以防東寇時陳友諒假名號據上流勢岌岌相軋上親率大軍往討之復從軍西上時時被堅執銳雜行伍中既而陳氏不敵狼顧鼠竄及師過安

慶陳守將聞江州破已先遁掠陣官韓某以城降城中餘衆尚數千人遣復入城撫諭比至韓不見信使勇士數十人列階下側目露刃相視復不為動從容正色撫以恩信衆為之逡巡退却乃還壬寅羅友賢復據貴池東流諸縣以叛屢招之不下令復往諭之即日就道既見為之宣揚威令陳述禍福請以八月出謝既而過期不至有旨命遣人再諭之乃遣宣使安中與俱時羅帥出駐城山留館中數日不得見至

夜半忽有兵百餘人呼譟而至復與安中俱被劫縛將加刃焉復大呼曰朝廷待汝寬厚汝自負恩失信至此而猶不知悔耶吾奉命再來救若等性命耳何得反加害言已衆稍靡未明羅帥遣人先釋復縛且謝過歸罪其下至日中大陳兵衛請相見設酒饌而安中仍拘繫他所時所持書檄已為劫去復以口舌代之反覆數百千言其人內懷猶豫復遂力求歸惟留安中不遣復曰吾二人奉使出疆同一命也豈有

一去一留之理若安中不遣而余獨歸朝廷若問安中某將何辭以對顧得歸亦死寧不得歸請與安中同死於此詞氣慷慨羅帥為之感動即令與安中等俱還既而文輝調守江西拜行省叅知政事欲薦之不可命其子拜而師事之

劉職方集

張羽字來儀潯陽人從父宦江浙兵阻不得歸與友徐賁約卜居吳興領鄉薦為安定書院山長再徙於吳與高啓楊基輩為詩友洪武四年徵至京師應對不

稱旨放還再徵授太常司丞上親述滁陽王事實命
羽撰廟碑以事竄嶺表未半道召還羽自知不免投
龍江以死羽文章精潔有法尤長於詩作畫師小米

所著有靜居集

白志

張安仁字體靜九江人洪武初知乳源以廉能著城池
公署學宮壇祠皆其初始撫綏有方人至今思之

廣東

通志

歐陽尚誠彭澤人以孝友著稱元末率衆訓練為邑保

障高皇帝征陳友諒尚誠率其衆齎牛酒勞師友諒
平召至京師授世襲本縣令力辭授本縣丞終其身
仍賜鐵券銀器遣歸弟尚八從征遇害既已喪元猶
乘騎奔走如生至家乃墮鄉黨神而祠之洪武乙巳
尚誠平洪懸洪黨復讐尚八妻謂其妾曰吾懼為洪
懸所辱遂閉門自焚死

人物志

吳禮德化人洪武中官金華知縣調嘉興歷河南西平
煩劇之地皆以廉能稱擢知河曲州改濟寧後以雲

南大理同知致政崇祀鄉賢祠

府志

謝敬湖口人洪武中任四川道御史直道自信糾彈不

避權勢以廉能稱

林志

周璟瑞昌人洪武丙子舉於鄉官刑科給事中永樂間以邊餉功擢山西左布政使九年考績士民上疏懇

留復任二十一年正統初致仕

人物志

周泰亨彭澤人永樂進士任廣西道御史巡按直隸湖

廣克貞憲度百僚肅清終湖廣按察僉事

府志

王賢字茂先德化人性質直略涉經史尤善於醫永樂
間以賢良方正薦辭不就惟以醫藥濟人不責其報
一日於玉波橋畔拾遺金一餅於其所候失金者歸
之卒年九十三人以為陰德所致

明一
統志

史中德化人永樂中由太學生任衡州通判守法恤民
不憚豪貴尋擢本州太守有中使貪橫經衡州中搜
詰其舟密奏於朝詔命誅之後轉陝西左叅政致仕

卒

人物
志

游瑞德化人永樂中由歲貢任給事中陞鎮江府知府
有惠政在郡十八年致仕民懷之

明一統志

燕善德化人永樂癸卯舉於鄉任湖廣武陵縣令馭吏
以嚴撫民以寬號為良吏入覲受勅旌異尋擢太僕

寺丞

府志

周振德安人永樂進士任浙江道監察御史間行伺察
悉知民隱按治貪墨無所假貸陞廣東僉事釐革宿

弊嶺南肅清

同上

豐慶瑞昌人正統進士任兵科給事中歷官河南左布政使後占籍鄆縣子耘為湖口訓導耘子熙翰林學士熙子坊解元進士代有文名

林志

駱敏湖口人正統進士任湖廣僉事時楚藩不法敏密疏上聞遂掛冠歸後徵為祭酒不起詔有司月給俸

廩優異之

人物志

呂鐸字文振德化人正統進士官兵部主事成化間轉山東右叅議進浙江左叅政為人寬簡與物無競又

性廉潔內帑賑邊故事得私其羨鐸秋毫不染朝野

重之

府志

勞鉞字廷器德化人景泰進士歷江浦臨清山陽三縣俱有政聲成化中晉太僕寺丞出知湖州有惠政卒官祀為城隍神焉族子堪號廬岳嘉靖進士官至副都御史博學能文所著有憲章類編詩海遡源柴桑

子書行世

人物志

按勞鉞所輯湖州府志頗稱善本

史珍字廷玉德化人中之子景泰進士知宿遷縣簡費
愛民不憚權貴嶽嶽有父風不為當道所悅稍遷鎮

江府通判解綬歸

同上

柯茂湖口人景泰四年舉於鄉任樂昌令以儉素率民
凡民間服用婚葬侈靡者痛抑之九年秩滿當遷民
奏留之又三年乃致仕歸

同上

王恕字南忠湖口人景泰進士任兵部主事恕諳天象
兼精兵法累官廣東叅議時征徭寇恕提兵隨韓雍

後將帥倚怨進止猺以之平

府志

夏英字育才德化人成化進士授南工部主事陞郎中
有經畫才陞延平知府改邵武下勸農桑之令均徭

役廣儲蓄有聲八閩卒於官所著有方田集

人物志

廖紀字惟修九江衛人弘治進士授浙江安吉知州擢
南職方副郎轉都水郎尋改營繕奉公執法多忤權
勢出知延平府又歷平陽皆有政聲嘉靖五年進廣

西按察副使征思恩田州叛苗遘疾卒

府志

王廷翰彭澤人勇敢有為正德己卯逆濠作亂游兵劫境廷翰率子弟鄉兵奮前擊賊矢盡力窮卒為所害

林志

黃材德化人讀書崇禮性孝友一日因父病篤藥不能療乃焚香籲天引刀割左股肉和粥進之後父沒妻

見其股瘡詢之始知其故鄉里莫不歎服

明一統志

柳邦傑號匡廬德化人正德丙子鄉舉宸濠叛潯城不守邦傑以二親老莫能行扶抱號泣賊感其孝得釋

謁選同知瓊州府事黎氏倡亂單騎往輯望風解散
以奏績入都遂致仕歸里杜門樂道益肆力於詩古

文辭著有匡廬小集

人物志

方庸字文中湖口人少業儒好義逆濠兵及湖口庸率

兵拒敵衆潰被執不屈遂遇害

府志

丁湛字子一彭澤人嘉靖進士累官禮科都給事時分
宜當國湛疏發其奸詔杖闕下幾斃鐫秩量移南曹
進四川叅議浙江副使既考績四閱月矣值黃巖失

守分宜猶追罪之坐落職分宜既敗即家起官廣西

叅政按察使平徭獐之變推陞河南巡撫引疾歸

人物

志

張準字立之德化人嘉靖辛卯鄉薦任寶應知縣縣衝

疲多水患準築堤安民至今有張公堤擢雷州同知

討廣黎有功雷人刻石以紀陞福建鹽運同知與時

不合遂乞歸

同上

陶欽夔字克諧彭澤人嘉靖進士授大理評事改御史

世宗巡郢中欽夔以扈蹕行時上嚴明羣臣兢兢救
過不瞻河南御史坐謫戍上命擇可者以聞衆推欽
夔遂被命百務倥偬皆咄嗟以辦河南饑疏請帑金
數萬全活甚多北敵入寇上疏引宋司馬韓范諸公
以責分宜分宜銜之例補太倉兵備歷襄陽辰沅五
溪蠻反欽夔用計擒其首龍許保餘黨悉平陞湖廣
按察使轉河南左布政使告歸終於家

同上

陶欽臯字克允生而穎異八歲能文日覽千言終身成

誦嘉靖進士授刑部主事尋改御史因爭東廠擅擬人命官呼為大膽御史即欽夔胞弟也

同上

孫冕字文中德化人少有才名為李獻吉所重授通州

訓導有北通備遺稿

列朝詩傳

夏之時字惟行瑞昌人介直嗜學善教寒士由鄉舉為台州別駕有富民爭子數年莫決囑書盈篋之時不開諭曰汝一人得子則一人無子殊難之吾為爾剖各娶一媳某媳生孫即嗣某後後各生孫並尸祝焉

之時母百歲乃卒感慕成疾繼逝惟餘書數卷

府志

曹鵬瑞昌人太學生性沈毅好施宸濠兵陷九江鵬與陳策吳守栢散資集兵千餘給鎧甲糧餉固守縣城濠擒當事欲上其功鵬曰昔朱家脫人於難不伐其能況士嘗學問者乎匿不見督學邵寶禮之曰奇男

子也

安志

按安志鵬同邑易鼎新吳筠劉廷棟德化黃相楊登雋隋周士左克勤九江衛呂國珍孫光前彭澤

劉克仁湖口張文獻伍子孝德安劉春俱以孝義
稱附志於此

王守中字一道彭澤人割股愈父疾母喪廬墓三年朝
夕奠祭如事生宸濠之變縣不守守中椎牲濾酒飲
衆為盟主殺賊擒二渠魁餘分竄鄉人賴以安全友
謔某者二子皆不肖一日攜千金投中曰惟子可托
故相累以儲衰年有餘子自取之友歸忽暴卒二子
方爭不已中聞即負金還二子感嘆卒改行祀鄉賢

同上

周禮讓字我華彭澤人幼孤事母純孝年七十猶作兒
舞以娛親口不言老以孝行舉屢與鄉飲歲侵捐廩
賑乏稱貸者輒焚其券有鬻妻者代贖之子二易昌
易元元登賢書性尤孝

同上

萬衣號淺源德化人嘉靖進士初授南刑部主事頻夢
其父心動請急歸抵家九日而父沒服闋補北刑部
奉命讞楚獄多所平反轉曲靖副使曲靖苗民雜處

時有騷動調劑安堵不復為患遷福建布政使時倭
犯興化告急夜從間道趨莆田設奇兵待之賊薄
城下斬首無算累官至河南左布政使積羨萬餘金
盡以實常平諸倉今中州尚號為萬公倉云未幾歸
築草堂開三逕為物外遊卒年八十一著有草禺子

匡廬圖考人紀新書藏於家

府志

余文獻字可徵德化人嘉靖進士博學善為文與婁東
濟南顏頴相上下海內爭傳之性至孝官大參遂請

養築慈壽堂以奉母旦夕不離左右居艱時凡四方書問皆不報服闋乃補謝焉是時嚴嵩柄國以文獻同鄉遣子世蕃招致之絕不一往官兵部時員外郎楊繼盛得罪嵩致之死凡獄中飲食藥餌及家人安置撫綏一出於文獻事見椒山自序年譜中

人物志

按余文獻事見他書者不可枚舉至其所著有九

匡集

蔡文魁號斂齋德化人嘉靖進士晉戶科給事轉通政

司叅議秩滿廷推巡撫鄖陽因忤時相意竟委政而歸在林下三十年以講學為事穆宗立召用辭不赴

同上

歐陽一敬字司直彭澤人嘉靖進士除蕭山知縣徵授刑科給事中劾罷禮部尚書董份遷兵科都給事言廣西總兵不當用勲臣因劾恭順侯吳繼爵罷之以俞大猷代寇大入陝西劾總督陳其學巡撫戴才俱奪官又以軍政劾英國公張溶山西浙江總兵官董

一奎等九人不職俱貶斥自嚴嵩敗言官爭發憤論
事一敬尤敢言隆慶初新鄭相高拱當國一敬劾拱
威制朝紳專柄擅國亟宜罷黜已而陳兵政八事部
皆議行南京振武營兵由是罷去積患遂除中官呂
用等典京營一敬力諫事寢俄擢太常少卿拱再起
柄政一敬即日告歸

白志

張科字達泉湖口人以進士為中書舍人中祕書多鈔
以歸改御史巡浙江與胡宗憲不相下彈抨之遂請

致仕時年二十八歲耳戚黨有與江陵相交厚者絕不一跡其家五十餘年悠優林下稍以聲色自晦人莫測其所操云

夏可範字子極瑞昌人嘉靖進士授刑部主事轉員外郎奉命錄囚見桁楊相望為求生不得垂涕曰匍匐入井伊誰之咎隱痛成疾而卒所著有龍溪集

人物志

按文德翼龍溪集序稱為隆萬間進士蓋失考也段孟賢號蒙岡湖口人嘉靖進士授刑部主事調同知

亳州改判溫州理糧諸常供外不入一錢轉知都勻
案牘盈前立時裁決為文汪洋亭蓄灑灑千言蕭然
舊廬不飾一椽性孝友父初艱嗣舉一姪為後友愛
如同胞數十年猶共爨焉

同上

桂枝揚德安人嘉靖進士少聰穎以神童稱事嫡母盡
孝官吏部主事舉錯黜陟一秉至公居官清儉服食

仍取給於家云

府志

張道號性泉湖口人嘉靖進士知餘姚縣補知秀水擢

御史按跡浙江風肅一時尋告歸不治生產冰檠自

勵卒於家崇祀名宦

同上

朱袞字文龍德化人嘉靖辛酉鄉薦由莆田教諭知南
靖歷知武城松陽潔已愛民興利剔弊俱立祠祀之
晉宛平輦下機務煩劇中官復干擾難制袞風裁嚴
峻人不敢干以私臺省交章薦之擢刑部郎清滯獄
理寬抑計三年全活者百餘人出守思恩數月即致
仕任宛日捐俸置九江會館買地置義冢人至今德

之卒年九十有五

人物志

蔡廷臣字蓋卿德化人嘉靖進士司理嘉興晉御史按
黔土司安國亨逼殺其叔時議興師征之廷臣單騎
入其營曉諭禍福國亨叩首馬前輸金贖罪廷臣性
耿直不徇江陵私請由順天巡按備兵信陽以山西

右轄掛冠歸

同上

時邦曉彭澤人性輕財樂施嘉靖甲戌歲大饑疫道殍
相望邦曉多為賑貸不責償出州地四千畝給種力

令親友分種歲稔遂不復取息萬厯己丑歲復侵遠
近遇糴不許曰吾積穀以備荒也豈為殖乎人各給

穀少者斗許多者石計亦不取償

府志

董伯益樂安人徙居瑞昌黃沙以漁為業家累萬金散
其資給窮人瘞漂尸振寒士其後董曷者伯益疏屬
也有膽智修建謝元暉墓起謝東山祠逆濠將脅其
子諸生董朝翰以千金贖歸拊其背曰千金活汝亦

幾殺汝盡散之貧人自捕魚澤中

人物志

陳思字再可瑞昌人以貢授安吉州訓導未及期歎曰
冗員哉投牒請裁自身始牒上即行有司計其常祿
及諸生餽遺遣人齎至其家思授使者歸報令置學

田浙有廉官錄思其一也

同上

王之垣號蠡澤德化人事母極孝母病篤醫無效垣為
嘗糞每旦夕焚香對天默禱病遂愈隆慶庚午鄉薦
任福建漳平知縣清介自矢秩滿解綬歸鄉杜門謝
客太守張養源題其閭曰大孝高隱壽八十四

同上

彭國光號秀角德化人萬歷進士知晉江行取吏科給事凡利害興革有裨國是者直言不避遷通州副使尋巡撫宣府時各省告歉國光捐歷俸解部資賑遠近德之卒於官勅賜半葬

府志

吳尚友號益齋湖口人萬歷進士在刑曹勲戚殺人時相親屬貪墨並寘之法有揮使以金珠賄獄立斥之湖口稅監李道擅作威福獨傾心於尚友請謁卒拒不見歸里置義田以贍宗族著有禮編會講文集

同上

郭一輪字仁宇德安人萬歷進士知海寧性耿介不事
逢迎因調知南安怡然曰拙宦速謗所固然也已任
工部屯田司主事未幾卒

人物志

萬嗣達字禹存衣子萬歷辛卯舉人歷官雲南金滄道
副使告歸凡地方利病侃言之不避嫌居官清介
治家孝友一遵父訓卒年七十有八子堯一以崇禎
庚辰特用累官工部主事孫邦和以薦辟任大理知

府

同上

許汝魁號仰亭湖口人萬歷進士知常山調上海大修水利軍例給白米數萬石歲凶無辦會開河之役汝魁自坐日中命進麥飯食之且甘軍士感動咸願以麥代米省金錢數萬奏績除南京吏部遷荆西道移榆林值邊警鼓勵三軍斬首數百三年五戰皆捷朝廷降勅褒之蔭一子遷至左轄尋擢南京光祿轉通政使卒於官

同上

王演疇字孟箕彭澤人萬歷進士任南京工部陞廣西

桂林知府乞休歸家無長物雅好著書善賦工真草
鏤板刻石慕其筆者不減二王其涉筆四六亦多膾
炙人口著有古學齋數十卷家訓和陶集諸書

同上

曹文緯字闇沖彭澤人萬歷進士任刑部以建言國本

削奪光宗即位贈光祿寺丞崇祀鄉賢

同上

劉日曦字馭初彭澤人萬歷進士令江陰值魏璫建生

祠日曦遂去官調龍游龍俗苦盜悉捕之一時屏跡
改都察院經歷歷南京兵部郎以薦陞浙江叅議未

任告老日曦素行嚴毅居家孝友殫心理學尤精大

易著有時習錄鏡心錄易經通解

同上

周禮嘉字體亨彭澤人萬歷庚子鄉薦以萬安諭知江

津值奢賊據渝郡邑望風披靡悉衆攻津禮嘉焚香

告天廣募鄉勇竭力守禦卒保全孤城隨以監軍同

秦良玉用計擒賊恢復全省序功應詔入京值魏璫

勢焰遂致仕歸田人咸服其清潔卒年六十有五子

易象崇禎壬午舉人

同上

洪維幹字禎南萬歷舉人知桐梓時奢酋亂維幹先遣家屬歸募兵死守有叛戍陳大義等為內應遂致城破縛維幹說降不屈賊先斬兩僕以懼之不為動惟欲坐正堂而死賊許之乃衣冠北面再拜被害事聞

贈尚寶司正卿

同上

邢士俊德化人萬歷貢生幼孤事母以孝好學通諸子百家性恬靜寡慾有父同榜現任九江招士俊至贈以金辭曰饘粥尚可自給不敢以私交玷公清議也

自後不再往見其介操如此

同上

黃學詩號起我德化人為諸生有文名教家嚴肅鄉里
推為長者年八十八郡守舉鄉飲禮敦請大賓乙酉
兵氛與妻熊氏同遇害時年九十有一熊年八十八
矣子開先號竹坪通經好古為人樂易坦懷居鄉好
急人之困文行一如其父以子雲師貴封刑科左給
事中卒年七十有二

同上

文士弘字元任德化人篤好理學中夜輒披衣起坐湛

然深思如此者三十年尤精周易別有神解為嚶鳴
會館孟月九日為大會每月四日為小會聚徒講學
聽者常數百人更以別業創建陽明書院崇禎三年
巡按御史葉成章持疏以師儒薦奉旨未拜以子理
嘉興滿考封文林郎年六十四卒學者私謚為安節

先生

同上

余朝相字君卜崇禎進士初知吳江縣歷官廣西提學
晉秩巡撫少司馬端方恬慎居官清譽所在彰聞後

崎嶇亂兵間共濟艱險改名心度隱峒獠不出

同上

趙光抃字彥清德化人父贊化工部郎中光抃舉天啓進士鄉人曹欽程父事魏忠賢驟得太僕少卿光抃語之曰富貴一時名節千古君不可不審欽程惡之明日即出贊化為南寧知府贊化以南寧惡地佗僚而死光抃奔喪歸崇禎初服闋除工部主事歷兵部郎中時軍事旁午光抃才氣豪邁應之有餘閱薊遼戎務周歷數千里盡得邊塞形勢戰守機宜列為十

二事以獻超擢巡撫右僉都御史駐密雲至即發監
視中官鄧希詔奸帝召希詔還而令中官孫茂霖覈
實茂霖為希詔解光抃反得罪永成廣東後希詔卒
誅十五年兵事急博咨邊才廷臣多舉光抃命赴京
召見德政殿奏對稱旨拜兵部右侍郎總督薊州諸
政軍務兼督諸路援軍發帑金四萬賞功援軍至者
雖衆皆觀望及河間失守不敢救已聞塞上警又疾
驅而北御史衛周胤言光抃不急河間回高陽坐視

淪覆帝令立功自贖及螺山之敗遂奪職候勘先抃
嘗薦白廣恩請召見賜宴帝從之廣恩抗命不赴帝
以是惡先抃與范志完同日死福王時太僕少卿萬
元吉言先抃受事破軍之餘身先被創與誤國志完
駢首西市迄今文武貴賤咸為抱冤給事中熊維典
亦以為言乃復其官

白志

傅弘祖字謙宇德化人選貢判廬州補福州旋致仕歸
喜道地方大計言不及私迴龍磯鎖江樓封郭洲築

長堤皆其所建議郡人賴之乙酉兵變遇害

人物志

孫承榮字君貺瑞昌人崇禎恩貢司訓仙居仙居缺令以邑事委承榮瘠土游災民賦逋抗承榮鞭笞不事而稅多勸輸再署寧海有劇盜嘯聚千人承榮下車佯言曰此夜中蝨不足措意忽疾馳單騎率數卒夜抵賊巢擒其渠正法釋餘黨不問盜平而民不擾幕府疏薦循資遷吉安永寧諭間關歸里絕意仕進寄情詩酒以壽終所著有越山清夢秦晉遊略雪扉齋

稿

同上

何九達字行可彭澤人選貢任來安縣耿介清慎當事
咸呼為先生隨致仕歸隱卒年九十餘鄉人以德星

目之

同上

黃堯彩字嗣眉德化人倪文正元璐丁卯鄉試所錄士
也崇禎間謁選除思州府推官尋晉知本府事值猱
苗亂妖僧田文澤起兵應之官兵戰失利堯彩單騎
出城四十里集兵大戰觀音山悉擒之功聞晉湖廣

布政司叅議分守湖北道以母老乞養乙酉避居辰州苗箐五年乃從間道奉母歸三年卒著有長安詩南歸草黔行集廬游草車中憶錄猗苗事宜歸田紀

略等書

同上

喻以恕字心如彭澤人崇禎進士初任工部主事管太倉庫清釐出納餘羨皆記籍纖毫不以自潤性寡合為忌者所中左遷浙江處州府司李恬然赴任益勵冰操治城旦書輒多所平反少貧家無寸產居官終

始一節乙酉轉秋官郎中更大故旋里未一載賫志
以終著有硯畬草槿園集四書詠明詩起古學彙存

諸書

同上

鄒逢吉字五從湖口人崇禎進士知武昌縣值峽山土
寇亂逢吉領閩帥搗平之流賊蹂躪江黃多方設備
與邑紳分汛防守又立龍虎二營倣戚繼光陣法令
武舉石補天督率訓練賊聞之不敢逼暇即與諸生
講道論藝後補臨淄縣行取出京擢兵科值闖變痛

哭欲赴死忽有鮮衣跨馬至者躡足耳語久之逢吉
泣對曰非所望於吾師也其人既去賊騎已至被繫
窟室飲食弗御慷慨括髮口占絕命辭飲酖而終

湖廣

名宦
志

葉承光號咸菴崇禎進士歷知長洲宜興寧國三縣都
城不守解組歸隱尤篤孝友賑族人貧乏者年七十

卒

府志

孫應龍字見田湖口人曾娶瞽目妻咸勸之易答曰我

棄誰受負心即負天也且幸有子矣忍乎嘗中副榜
復考劣督學嘉其行曰此可風也得貢任合肥訓導

有勸娶妾者終弗聽

人物志

張思問號鍾陽湖口人生平不慕榮利惟究心先天理
學每有所得則隨書之嘗誦邵子之言曰圖雖無文
吾終日言而不離乎是著有理數卦氣圖書聲律等

書崇禎九年以孝廉賢能應徵辟隨卒

同上

李獨明字五千德化人為諸生不屑屑制舉義汎濫典

籍崇禎之季徵聘遺逸郡以李名上旋赴主爵當為
邑會寇難不果補乙酉城陷死於兵著有孔子世家
七十子列傳禮記改本孫武子集註江上疾呼易象

經別諸書

同上

柳清字師伯德化人為郡諸生隱居洞林山不求聞達
嘗以觴詠自娛歲乙酉偶入郡城遇兵變具衣冠赴

府學泮池死焉

同上

田化龍字騰岳德化人武藝精嫻有萬夫之勇以將材

署南湖營守備時永豐賊熾化龍進勦斬俘無筭寇
敗潛伏山林孤軍深入被重圍矢盡援絕鏖戰而死

永豐人立廟祀之迄今有禱必應

府志

董四民九江衛世職百戶總制袁繼咸聞其技勇召置
麾下題授都司左兵東下調入城防守四民見事急
曰吾世受國恩當以死報命其妻史氏妾姚氏並二
子溺死於池畢乃登城大呼發矢連斃數人拔刀自

刎於城上

人物志

徐行可字三山九江衛世襲指揮僉事幼讀書明大義
左兵陷城行可母汪氏投井死妻鄒氏婦陳氏繼之
行可隨大書於屏曰世受國恩合門殉節以報投筆

北向拜自經於望京門城樓

同上

李全昌字文宰德化庠生天性孝友母七十兄弟羣起
為壽值歲饑全昌更出米二百斛傳母命賑之母卒
喪事備極情禮乙酉左兵東下兩兒百計出重圍全
昌夫婦依依母殯不忍離比城破賊盡擁不得前過

陽明祠見火起殺人擾攘中值妻孫氏逃亦至全昌
知不免顧謂曰李氏幸不絕吾得死處矣趨入祠就

縊孫氏奔赴氣已絕大痛亦投井死孫氏孝廉高山

女也兩兒長曰鍼丙午舉人次曰鏞

同上

柳鴻字漸于德化人府學生得金谿餘姚二先生語錄

遂留心探索於知行合一之旨深有悟入事親尤篤

孝道父卒哀毀幾絕乙酉左兵倡亂鴻以母老不能

行力負潛逃賊追及不忍捨竟冒白刃而終

同上

孫大華德化市民左良玉東下挾督師袁繼咸與之俱
袁懼為所併調兵入城標將郝效忠謀翻城以應左
驅其卒乘夜淫掠民不勝憤多執而殺之次日郝以
民激兵變為辭露刃而噪袁倉卒計窘欲窮詰殺兵
者又莫辨為誰大華獨挺身出呼於市曰殺兵者我
也無干於衆遂斬以殉

同上

國朝

文德翼字用昭明崇禎進士司李嘉興平反得釋者甚

多大慙吳中彥子徵雱倚恃持國柄者武斷鄉曲戕
害善類德翼特揭而力討之卒置於理後某府丞具
疏汙巖萬狀實為左袒中彥者修怨也居無何內召
秉銓值變作知事不可為遠遁歛之商山左良玉奔
九江以病為辭絕意不還鎮時督師呂大器實臨之
良玉不為禮德翼諷鄖撫王某曰文武固宜調和亦
當存憲體公宜禮敬制閫使悍將稍知朝廷之尊王
領之左乃迎謁成禮交誼屢致激變而綢繆調護卒

無事者德翼之力為多性至孝官司李時父計至適
在會城即號泣徒跣歸母沒年已望七哀哀若孺子
慕博貫經史長於詩古文詞所著有雅似堂集
傭吹錄一集二集訟過錄宋史存讀莊小言

魏據

學渠所
撰墓志

黃雲師號雷岸德化人明崇禎進士授給事中歷吏戶
刑兵四科抗疏甄別京卿凡所指陳詳明剴切為冢
宰鄭元嶽所器重催楚粵餉題免鄭襄諸郡逋欠三

十六萬有奇尋歸卜居蓮花峰下徵辟不赴杜門著述有易裁詩正采榮堂集藏於家卒年七十有六孫

圖康熙戊戌進士

府志

丁孕乾字爰大德化人在諸生中風流蘊藉絕似晉人獨工於詩與熊兆佳趙映第相倡和清淨遙深力追唐之中葉竟陵譚元春亟推之以明經任南昌學博有十七年詩稿又著閨草及西灣詩話

白志

吳士魁字聚之德化人賦性醇厚方正自持崇禎末年

以明經任淳梁司訓署縣事輯兵安民莫不服其才
略閱數月遂解綬歸里性好善老而愈篤鄉飲大賓

壽八十子用光亦鄉飲介賓癸卯舉人

同上

廖士貞德化人由舉人任四川營山縣逆賊彭時亨攻
城失陷被執遇害贈四川按察司僉事蔭一子入監

安志

閔肩喜字玉孺德化人順治選貢授福建龍巖縣丞甫
蒞任海賊入寇本邑印官負重疾未視事肩嘉籌餉

登埤晝夜守禦時漳屬十邑已陷其九龍巖卒賴以
全上官嘉其功委署安溪武平德化南安諸篆陞延
安府同知在任十月以疾卒官著有雪齋蕉夢軒諸

文集

白志

周岱生字青嶽德化人由拔貢授貴州餘慶令丁內艱
補粵西平南令地不產菜蔬教以播種灌溉之方田
荒不闢招撫粵東流民開墾甲寅吳逆叛寇盜蠭起
有緝成德為亂破梧州攻平南岱生率鄉兵出討賊

退踰月復至岱生擐甲躍馬斬賊賊攻益急矢且盡
義勇戰死者三十餘人岱生退保城浹旬援絕城陷
賊繫岱生往潯妻楊氏自刎死賊誘之降岱生厲聲
曰何不速殺我遂遇害長子儒且哭且罵賊並慘戮
之次子燻聞變走粵西尋父母兄三屍具告潯州守
守上具事中丞郝浴特疏請卹贈按察司僉事

子祭葬

據安志
增撰

張孺子湖口人同父刈蘆於洲有虎突出掠其父孺子

追及以杖連擊虎首砰然有聲遂脫父難療治而愈

知縣喬鉢為之傳

安志

按孺子同邑吳一哲吳之達周澤宗汪應祥德化

熊文錦亦皆以孝義見安志附錄姓名於此

劉鎮寶字

闕


彭澤人給事堂子康熙庚子舉人授雲

南烏蒙通判服官敬慎素以忠貞自矢雍正八年逆

蠻寇城鎮寶臨難不屈遂遇害事

聞贈按察司僉事

賜祭葬



江西通志卷九十二